

**INATSIARTUT
OMBUDSMANDIATA
UKIUMOORTUMIK
NALUNAARUTAA
2005**

88. Kommunimut tikeraarnej.

1. **Sulianik siusinaartumik soraarnerussutisianut tunngasunik misissuinermi ataatsimoortumik oqaaseqaatit.**

Suliat K Kommunimi siusinaartumik soraarnerussutisianut tunngasut Ombudsmandip juni 2004-mi misissorpai.

Ajornartorsiutit suliani uteqqiattut misissuiffigineqarnerannik suliap aallartinneqarnissaa Ombudsmandip toqqarpaa.

Ombudsmandi tamatumunnga atatillugu ilaatigut makku pillugit oqaaseqaateqarpoq:

Suliat arnanut qinnuteqartunut tunngasut uisup/inooqataasup inuttut normuata ataani pilersinneqarsimasut, siusinaartumik soraarnerussutisiaqartut nuunnerit soraarnerussutisiaqalersinneqarnissaannik aalajangiinerit allannortinnissaannut periarfissat, suliani allagaatinik immikkoortitsisarnej, suliani allatuiiffiit (journalark), piffissaq kommunip sulianik suliarinninnermut atortagaa aamma suliat uppersaasarsorneqartarnerat, allagaatinik ullulersuisarneq, oqariartaatsinik atuineq, piffissaq soraarnerussutisiaqalersitsiviusoq, suliffissarsiuussisarfimmu nalunaartussaataitaneq, akuersinermik uppersaasernerit, suliami illua tungiusup isumaanik tusarniaasarneq, sulianik paasisutissartalersuisarneq, imigassartorunnaarsitsiniarluni katsorsaaneq, soraarnerussutisiaqalernissamik qinnuteqaatit pisoqaanerusut, utoqqalinersiaqalernermit ikaarsaariarneq aamma itigartitsissutinut malitseqartitsisarnej. (J.nr. 11.73.88.71/045-04)

Suliat K Kommunimi siusinaartumik soraarnerussutisianut tunngasut 1. juni 2004-mi misissorpakka. Misissuinermi siusinaartumik soraarnerussutisiaqalersitsineq pillugu suliat katillugit 88-it ilaatinneqarput. Misissuinera ilaatigut ataatsimut apeqqutinik arlalinnik, ilaatigullu suliat ataasiakkaat pillugit apeqqutinik arlalinnik K Kommunimut saqqummiussinissannut pissutissaqalersitsisimavoq.

Taamaalillunga K Kommuni allakkani 12. august 2004-meersuni qinnuigaara apeqqutit ataatsimut tunnganerusut arlallit kommunimi siusinaartumik soraarnerussutisiat pillugit sulianik misissuinermi saqqummertut akeq-qullugit.

Suliassaqarfiit ataasiakkaarlugit immikkoortillugit kommunimut apeqqutigisimasakka, kommunip aqutigineqartunut akissutai, apeqqutit taakku pillugit oqaaseqaatigigallakkakka, oqaaseqaatigigallakkannut kommunip oqaaseqaatai kiisalu K Kommuni oqaaseqaatigigallakkakka pillugit oqaaseqaateqarsimatillugu inaarutaasumik oqaaseqaatikka tulluuttuni allaserineqarput.

1. Suliat arnanut qinnuteqartunut tunngasut.

Kommunimut 12. august 2004-imi imatut allappunga:

"Arnat qinnuteqaateqartut eqqarsaatigalugit sulianik pilersitsisarnermi assigiinngitsunik periaaseqartoq maluginiarpara.

Suliat arnanut qinnuteqaateqartunut tunngasut ilaatigut imatut pilersinneqartarsimapput:

1. suliaq qinnuteqartumut namminermt tunngasoq, tamannalu suliani arlalinni atuuppoq, qinnuteqartup kisermaajunera imaluunniit inooqateqarnera/aappaqarnera apequtaatinnagu,

2. suliami qinnuteqartup inooqataanut/aappaanut tunngasumi, aamma

3. suliami qinnuteqartup inooqatigisimasaanut/aapparisimasaanut tunngasumi, qinnuteqartoq allamik inooqateqalersimagaluartorluunniit/aappaqalersimagaluartorluunniit, assersuutigalugu X, suliarma taassuma siusinaartumik soraarnerussutisiaqarneranut tunngasoq suliami taassuma siusinnerusukkut inooqatigisimasaanut Y-mut tunngasumi ingerlatinneqarmat.

Suliami Y2-mut tunngasumi siusinnerusukkut aapparisimasaannaa pinnani aammali massakkut aapparisaa pillugu suliaq ingerlatinneqarput.

Kommuni qinnuigineqarpoq sullitat tamarmik immikkut suliamik pilersitsivigineqarsimanninnerat pillugu nassuiaateqaqqullugu."

Kommuni allakkani 10. august 2004-meersuni imatut akivoq:

"Suliat arnanut qinnuteqartunut tunngasut aappaasup/inooqataasup inuttut normuata ataani pilersinneqartarnerat isumaginninnermik ingerlatsiviup siusinnerusukkut periaaserisimavaa, tassami suliamik suliarinninnerup ilarujussuani pissutsit aappaasumut/inooqataasumut tunngasut pillugit paasissutissat pigineqarnissaat piusaqataasarmat, taamaattumillu suliat ataatsimoortinneqarnerat pissusissamisoortut isigineqarsimalluni.

K Kommunimili suliat inunntu ataasiakkaanut tunngasut tamarmik inuit pineqartut inuttut normui atorlugit immikkut pilersinneqartussaapput. Taamaallilluni tamanna siusinaartumik soraarnerussutisiat pillugit sulianut aamma atuuppoq.

Periaaseq taanna kommunip sulianik suliarinnittuutit erseqqissarneqarniarpoq, taamatuttaarlu suliat massakkut ataatsimoortinneqarsimasut immikkoortiternissaanut nukissatut atugassiissutinik immikkoortitsisoqarniarluni." (Atorfeqarfimmi nut-sigaavoq)

Oqaaseqaatigigallakkakka:

"Inunnik nalunaarsuisarneq pillugu nalunaarummi nr. 588-imi, 10. august 1998-imeersuni, Kalaallit Nunaannut atuuttuusumi, § 22, imm. 1-ip aamma 2-p aallaaviat tassaavoq inuup kinaassusersineqarnera inuup pineqartup nammineq inuttut normua atorlugu pisassasoq. Aalajangersagaq taanna imaattunik oqaasertaqarpoq:

"§ 22. Pisortaqarfiit inuup normuanik kiussusersiniutitut imaluunniit journalnormutut atuisinnaapput pisortap susassaqartup suliassamik isumaginninneranut atattillugu.

Imm. 2. Inunnik ataasiakkaanik kinaassusersiueqartassaaq pineqartup inuttut normua tunngavigalugu. Pisortat ingerlatsiveqarfianni pisariaqassappat inunnit arlalinnik suliasamat ataasiumut ilanngussuinissaq taava pisortat namminneg aalajangiiffigissavaat suliasaqarfiup iluani nalunaarsuinissap naleqqunnerpaap qanoq aqqissuunneqarnissaa. Aqqissuussinermi ilaatigut naligiissitaanermut tunngassutillit pingaartinneqartassapput."

Allagaateqarfearneq pillugu Inatsisartut inatsisaanni nr. 22-mi, 30. oktober 1998-imeersumi kapitali 3-mi §§-itigut 6-ikkut aamma 7-ikkut makku aalajangersarneqarput:

"§ 6. Suulluuniit paasissutissartallit pisortat sullissiveqarfiini sulinikkut pilersinneqartut taakkuluuniit aqutugalugit pilersinneqartut toqqorneqassapput.

§ 7. Pisortat sullissiveqarfiutaasa toqqortaatinik qaqugukkulluuniit isumannaatumik suliarineqarnissaat toqqortarineqarnissaallu isumagissavaat.

Imm. 2. Pisortat sullissiveqarfiutaasa toqqortatik pisortat sullissiveqarfiisa allat toqqortaataannit immikkoortissavaat."

Inatsisartut inatsisaanni tassani § 9-kkut aalajangersarneqarpoq toqqortaatinik suliarinnittarneq toqqortarinnittarnerlu pillugit malittarisassanik Naalackersuisut aalajangersaasinnaasut. § 9-kkut aamma aalajangersarneqarpoq kommunit ingerlatsiviisa toqqortaatinik suliarinnittarnerat toqqortaqartarnerallu pillugit malittarisassat Kalaallit Nunaanni Kommunit Kattuffiannut isumaqatigiinniareernikkut aalajangersarneqassasut. Naalackersuisut kommunini ingerlatsiviit toqqortaatinik suliarinnittarnerat toqqortarinnittarnerallu pillugit malittarisassanik aalajangersaasimannngillat.

Kalaallit Nunaata Katersugaasiviata Allagaateqarfiatalu allakkanik nalunaarsuiffeqarnermut toqqorsiveqarnermullu pilersaarusiornermut ilit-sersuutit Inatsisartut peqqussutaanni tassani § 11 tunngavigalugu aalajangersassavai.

Atuagaq "Kalaallit Nunaanni kommunini allagaatinik toqqorterisarneq kasiiliisarnerlu pillugit aalajangersakkat"-nik qulequtaqartoq Kalaallit Nunaata Atuagaateqarfiata Allagaateqarfiatalu 1991-imi saqqummersissimavaa.

Sulianik pilersitsisarneq eqqarsaatigalugu inunnik nalunaarsuisarneq pillugu nalunaarummi nr. 588-imi § 22, imm. 2-kkut qulaani issuarneqartukku aalajangersarneqarpoq inuit ataasiakkat kinaassusersineqartarnerat inuit pineqartut nammineq inuttut normui atorlugit pisassasoq, inuit arlallit suliami ataatsimi ataatsimoortinneqarnissaat pisariaqartuunngippat.

K Kommunip akissutaa imatut paasivaraa arnat qinnuteqartut aappaa-sup/inooqataasup inuttut normuata ataanut inissinneqartarnissaat kommunip pisariaqartutut isigiunnaara. Isumaqarpunga tamanna naligiissitsinermi isiginiagassat § 22, imm. 2-mi oqaaseqatigiit pingajuinit ersertut eqqarsaatigalugit aamma naapertuunnerpaasoq.

Tassani aamma ilaavoq suliap pineqartup journalnormu suna atorlugu nalunaarsorneqarsimanera nalornissutigineqarpat suliami allagaatinik paasitinneqarsinnaatitaaneq pillugu malittarisassanik aqutsinerup ajornakusoortunngorsinnaanera.

Taamaattumik K Kommunip periaasia nutaaq ilalersinnaavara, taannami imatut paasigakku sulianik pilersitsineq pineqartut namminneq inuttut normui atorlugit pisolissasoq, taannalu atorlugu toqqorneqartalissasut."

2. Siusinaartumik soraarnerussutisiaqartut nuunnerit.

Kommunimut 12. august 2004-mi imatut allappunga:

"Malugaara siusinaartumik soraarnerussutisiaqartut nuunnerit kommunitut najugarivitarisimasaasa siusinaartumik soraarnerussutisiaqalersitsinissamik inaarlugit aalajangiarisimasaat kommunit arlallit suliareqqittaraat imaluunniit allannngortittaraat.

Kommuni qinnuigaara kommuni pisuni taamaattuni qanoq iliortarnerseq nalu-naarutigeqqullugu."

Kommuni allakkatigut 10. december 2004-meersutigut imatut akivoq:

"Pisortanit soraarnerussutisiaqartut pisortanit pensionisiat pillugit Inatsisartut peqqussutaanni nr. 9-mi, 15. april 2003-meersuni § 8 tunngavigalugu pisortanit soraarnerussutisianik pisartagaqartut pisussaapput pissutsit imminnut tunngasut allannnguutaat soraarnerussutisariatinneqartut aaqqiiffiqineqarnissaannik unitsinneqarnissaannilluunniit nassataqarsinnaasut tulleriinneri malillugit kommunimut Naalakkersuisunullu nalunaarutigissallugit. Tamanna tunngavigalugu K Kommunip isumagin-ninnermik ingerlatsiviani siusinaartumik soraarnerussutisiaqartut nuunnerit pissutsit pineqartup nammineq aningaasaqarnikkullu atugaasa qulaajarneqarnissaat siunertaralugu oqaloqatiginiarlugit aggersarneqartarnerat aalajangersimasumik periaasiuvoq. Paasissutissat siusinaartumik soraarnerussutisianik malittarisassat malillugit allannngortinneqartariaqarnerannik unitsinneqartariaqarnerannillunniit nassataqartut oqaloqatigiinnermi saqqummerpata tamanna iliuuserineqassaaq.

Taamaalilluni siusinaartumik soraarnerussutisiaqartitsinissamut piumasaqaataasut suli atuunnerannik nakkutilliineq isumaginninnermik ingerlatsiviup pisussaaffigalugu suliassatut isigaa.

Kiisalu ilanngullugu oqaatigineqarsinnaavoq siusinaartumik soraarnerussutisiaqartut maani najugallit tamarmik aggersarneqartartut, pissutsit siusinaartumik soraarnerussutisariilersinneqartut allannngortittariaqarnerannik nassataqarsinnaasut paasineqaraangata." (Atorfeqarfimmi nutsigaavoq)

Oqaaseqaatigigallakkakka:

"Apeqqut matumani pilersaq tassaavoq siusinnerusukku kommunerisap siusinaartumik soraarnerussutisiaqalersitsinissamik aalajangiinera kommunimut nuuffigineqartumut qilersuisuunersoq.

K Kommunip akissutaa aamma imatut paasivaara siusinaartumik soraarnerussutisiaqartut nuunnerit kommunip aggeqqusarai, pissutsit siusi-

naartumik soraarnerussutisiaqartut namminneq aningaasaqarnikkullu atugaat qulaajarniarlugit, siusinaartumik soraarnerussutisiarilersinneqarsimasut allanngortinneqarnissaasa unitsinneqarnissaasaluunniit misisuiiffigineqarnissaat siunertaralugu.

Pisortanit pensionisiat pillugit Inatsisartut peqqussutaanni § 8 imaatunuk oqaasertaqarpoq:

"§ 8. Pisortanit pensionisiaqartut kommunimut Naalackersuisunulluunniit nalunaaruteqarnissamik pisussaataapput, pensionisiamik iluarsivigineqarnissaannik unitsinneqarnissaannilluunniit kinguneqarsinnaasunik inuttut atugarisamigut aningaasaqarnermigullu allannguuteqartoqarpat.

Imm. 2. Inuttut atugarisanut aningaasaqarnermullu tunngasutigut eqqunngitsumik paasisutissiisimaneq tunngavigalugu pissusissamisuumngitsumik pensionisiaqartitsisoqarsimappat aningaasat pisassarinnngisat utertillugit akilerneqarnissaat piumasagaataasinnaavoq imaluunniit pensionisiassanit ilanngaatilugit akilersorlugit unerartinneqarsinnaallutik."

Pisortanit pensionisiat pillugit Inatsisartut peqqussutaanni § 8 pillugu oqaaseqaatinit makku erseerput:

"Aalajangersakkakut erseqqissarneqarpoq pensionisiallip inuttut atugarisamigut allannguutit nammineerluni nalunaarutiginnissaat pisussaaffigimmagu, soorlu katinnikkut apparilerneq avinnerluunniit, aamma aningaasatigut atugarisani, soorlu amerlanerusunik isertitaqartalerneq.

..."

Soraarnerussutisiaqartoq kommunimit siusinaartumik soraarnerussutisiaqalersitsisumit kommunimut allamut nuuppat siusinaartumik soraarnerussutisiat pillugit suliaq suliareqqinneqassasoq aalajangersakkami imaluunniit aalajangersagaq taanna piareersarlugu suliani oqaatigineqanngilaq.

Tamanna pillugu oqaatigaara paasinneqqaarnera unaasoq siusinaartumik soraarnerussutisiaqalersitsineq tassaasoq akuersaartumik aalajangiineq. Taamaattumik uanga paasinneqqaarnera unaavoq kommuni nuuffigisaq aalajangiinermik taamaallaat allanngortitsisinnaasoq kommuni qimataq allanngortitsisinnaasimappat. Suliaq 2004-mi ukiumoortumik nalunaarutima kalaallisuuani quppernermi 118-imi tulliinilu naqinneqarsimasoq takuuk.

Aalajangiinermik taassuminnga kommunip nuuffigineqartup allanngortitsisinnaaneranik naliliinermi kommuni pisussaavoq ilaatigut manna pingaartillugu isiginiassallugu, tassalu innuttaasoq pineqartoq kommunip qimatap aalajangiinera tunngavigalugu qanoq annertutigisumik naleqqusarsimansoq. Aammattaaq kommuni allaasumik aalajangiissaguni pisutsinik oqimaalutaanermi sunniuteqarluartunik takutitsisariaqarpoq.

Taamaalilluni uanga paasinneqqaarnera unaavoq kommuni nuuffigisaq siusinaartumik soraarnerussutisiaqalersitsinissamik kommunip qimatap

aalajangiineranik allanngortitsiniarnermini nammineq isummani maliin-narlugu aalajangiisinnaanngitsoq.

Paasissutissatut tunngaviusut allannguuteqanngitsut tunngavigalugit kommunip nuuffigissap naliliinerata kommuni nuuffigineqartoq allaasumik aalajangiinissaanut pisinnaalersinngilaa.

Malugeqqullugu oqaatigaara kommunimut allamut tikeraarninnut ata-tillugu paasigiga kommunip siusinaartumik soraarnerussutisialinnik nuut-tunik siusinaartumik soraarnerussutisiaqalersitsinissamut piumasaqaatit suli eqqortissimaneqarnerannik misissuinissaq siunertarlugu aggeqqusi-sarnera suli atorineqartoq, tamannalu Ilaqutariinnermut Pisortaqarfiup ilitsersuina malillugu pisartoq. Taamaattumik Ilaqutariinnermut Pisor-taqarfiup tamatuminnga tusarniaaviginissaa isumaliutersuutigaara.

Taamaattorli K Kommuni qinnuigaara K Kommunip periaasia pillugu oqaaseqaatigigallakkakka pillugit oqaaseqaateqaqqullugu.

Aammattaaq oqaatigaara siusinaartumik soraarnerussutisiaqalertitsi-nissamik aalajangiinerup allanngortinneqarnera soraarnerussutisianil-luunniit unitsitsineq nutaamik aalajangiinertut isigineqassasoq. Suliassat suliarineqartarnerat pillugu inatsimmi aalajangiineq pillugu malittarisas-sat malinneqarnissaat tamatuma nassataraa."

Oqaaseqaatigigallakkannut K Kommunip oqaaseqaatai 3. november 2005-imi tiguakka. Oqaaseqaatinit taakkunannga makku erserput:

"B-p oqarnera malillugu siusinaartumik soraarnerussutisiallit siusinaartumik so-raarnerussutisiaqarnissamut inatsimmi piumasaqaataasunik eqqortitsinerat naliliiffi-giniarlugu oqaloqatigiinnissamut ingerlaannartumik aggersarneqarneq ajorput. Siu-sinaartumik soraarnerussutisiallit nuunnerit siunnersortimit oqaloqatigineqartarput, kommunimut nuunnertik nalunaarutigiartorlugu saaffiginnikkaangata, K Kommu-nillu siusinaartumik soraarnerussutisianik tunissagaatik oqaatigigaangassuk.

Siusinaartumik soraarnerussutisiaqarnissamut inatsimmi piumasaqaataasut eq-qortinneqarsimanagerat nalornissutigineqarpat siusinaartumik soraarnerussutisiaqartut siusinaartumik soraarnerussutisiaqartunut K Kommunimi najugaqartunut naligiti-taallutik oqaloqatigineqarnissaminnut aggeqquneqartarput. Siusinaartumik soraar-nerussutisiaqartup aningaasaqarnerani timikkulluunniit atugaani allannguuteqarto-qarsimanageranik paasissutissat saqqumnerpata suliap suliarineqaleqqinnera oqalo-qatigiinnerup nassatarisinnaasussaavaa. Pisumi taamaattumi suliassat suliarineqar-tarnerat pillugu inatsimmi malittarisassat malinneqartussaapput." (Atorfeqarfimmi nutsigaavoq)

Inaarutaasumik oqaaseqaakka:

"Malugaara siusinaartumik soraarnerussutisiallit nuuttut siusinaartu-mik soraarnerussutisiaqarnissamut inatsimmi piumasaqaataasunik eqqor-titsisimanagerat naliliiviginiarlugu K Kommunip oqaloqatigineqarnissaan-nut ingerlaannartumik aggeqqusanngikkai.

Kommunip oqaatigisaasa uanga paasinninninnik allannqortitsinissanut pissutissaqalersinngilaangga."

3. Suliami allagaatinik immikkoortitsisarneq.

Kommunimut 12. august 2004-mi imatut allappunga:

"Sulianik misissuininni malugaara suliani allagaatit allaqqaarneri arlallit suliani pineqartuniittanngitsut. Tamanna pingaartumik siusinaartumik soraarnerussutisiaqalerniarluni qinnuteqaatit, nakorsat oqaaseqaataat allagaatillu allat suliat ataasiakkaat paasisaqarfiginissaannut pisariaqartut eqqarsaatigalugit atuuppoq.

Kommunip uannut oqaatigaa allagaatit immikkoortinneqartartut, suliamik suliarinninnerup misissorneqarnissaa siunertaralugu.

Kommuni qinnuigaara qulaani taaneqartut pillugit oqaaseqaateqaqqullugu, matumani allagaatit sulianiinnginnerisa ilumut naleqquttuunerat, allagaatit pineqartut tigumminagit sulianik ingerlatsisut ataasiakkaat sulianik qanoq iliorlutik suliarinnitarnerat kiisalu assersuutigalugu suliami allagaatinik paasitinneqarnissamik qinnuteqaatit qanoq iliorluni akuersaarneqartarnerat ilanngullugit eqqarsaatigalugit."

Kommuni allakkatigut 10. december 2004-meersutigut imatut akivoq:

"Periaaseq misissuinissaq siunertaralugu allagaatinik immikkoortitsisarnermut tunngasoq isumaginninnermik ingerlatsiviup ilisarisinnaanngilaa.

Eqqorporli siusinnerusukkut periaasiusimammat allagaatit siusinaartumik soraarnerussutisiaqarneq pillugu suliamut tunngasut suliamit inummut namminermut tunngasumit immikkoortinneqartarnerat. Periaaseq taanna sulianut siusinaartumik soraarnerussutisianut tunngasuni inuup ataasiinnaap akisussaaffimmik tigusinera tunngavigalugu isigineqassaaq, taamaattumillu suliami allagaatit pineqartut immikkoortillugit toqqortarineqarnissaat taassuma kissaatigisimallugu. Periaaserli taanna naleqquttuusimangilaq, taamaattumillu taanna isumaginninnermik ingerlatsiviup atorunnaarsimavavaa, massakkullu suliani siusinaartumik soraarnerussutisianut tunngasuni allagaatit suliarpiamat utertinneqarnissaat anguniarlugu suliniutigineqarpoq.

Isumaginninnermik ingerlatsiviup tamatuma kingornatigut isumaa unaavoq suliani inunnut ataasiakkaanut tunngasuni allagaatinik immikkoortitsisarnermi periaaseq eqqortoq tassaasoq allagaatit assilineqartassasut, taamaalillutik allagaatit allaqqaarneri tamarmik suliarpiamiiginnartinneqartalissallutik.

Taamaattorli isumaginninnermik ingerlatsiviup nassuerutigaa suli pisoqartartoq allagaatit allaqqaarneri suliami inunnut tunngasumi nassaassaassanatik, kisiannili periaaseq taanna sulianik suliarinnittunut erseqqissaatigineqarpoq sulilu erseqqissaatigineqartassalluni.

Siusinnerusukkut periaasiusimasoq allagaatinik paasitinneqarnissaaq eqqarsaatigalugu isumaginninnermik ingerlatsiviup ilisimasai malillugit ajornartorsutissaqartitsisarsimangilaq, tassami periaaseq taanna sulianik suliarinnittut tamarmik ilisimasimammassuk, taamaalillutillu allagaatit immikkoortinneqartut allagaatinik paasitinneqarnissamik qinnuteqatoqartillugu suliamut inummut tunngasumut utertillugit ilineqartarsimammata.

Periaaseq massakkut atuuttoq malillugu suliaq inummut tunngasoq tamarmiulerpoq, taamaattumillu allagaatinik paasitinneqarnissamik qinnuteqaatinut atatillugu ajornartorsiutissaqartitsinani." (Atorfeqarfimmi nutsigaavoq)

Oqaaseqaatigigallakkakka:

Toqqorterisarneq pillugu malittarisassani Kalaallit Nunaannut atuutuni § 6-ikkut aamma 7-ikkut qulaani issuakkakkut aalajangersarneqarpoq suullunniit paasissutissartallit pisortat sullissiveqarfiini sulinikkut pilersinneqartut toqqortarineqassasut, kiisalu allagaatit illersorneqarsinnaasumik suliarineqassasut toqqortarineqassasullu.

Kalaallit Nunaanni kommunini allagaatinik toqqorterisarneq kasiiliisarnerlu pillugit tunaartarisassatut malittarisassani qulaani taaneqartuni toqqorterisarneq kasiiliisarnerlu pillugit aamma malittarisassaliortoqarsimavoq.

Taamaattumik isumaqarpunga suliani inunnut ataasiakkaanut tunngasuni allagaatit allaqqaarsimaffiinik immikkoortitsisarnermik kommunip periaaseqarsimanera pitsaanngitsorujussuusooq.

Uanga paasinninnera malillugu naleqqunnerussaaq suliani ataasiakkaani allagaatinik immikkoortitsissagaanni allagaatit immikkoortinneqartut pillugit sulianik nutaanik pilersitsisoqartarpat, taamatuttaarlu naleqquttuussalluni suliani pisoqqani allanneqartarpat allagaatit sorliit suliamut nutaamut nuunneqarsimasut kiisalu allagaatit taakku assilineri ilanngullugit ilineqartarpat. Tamanna immikkut pingaaruteqarpoq allakkat isertut anisullu oqartussaasunit suliani nalunaarsorneqartanngippata.

Tassani aamma ilaavoq suliami allagaatit sumiinnerinik ilisimasaqannginnerup pisuni allani oqartussaasup suliaata tamakkiisumik toqqissisimanassuseqartumik ingerlanneqannginneranik nassataqarsinnaanera.

Malugaara allagaatinik ataasiakkaanik sulianit inunnut ataasiakkaanut tunngasunit immikkoortitsisarnermik periaaseq kommunip atorunnaarsimagaa. Aammattaaq malugaara allagaatinik ataasiakkaanik sulianit inunnut ataasiakkaanut tunngasunit immikkoortitsisarneq allagaatinik paasitinneqarnissamik qinnuteqaatinut atatillugu kommunip paasinninnera malillugu ajornartorsiutissaqartitsisarsimanngitsoq."

4. Suliani allattuiffinnik naqitanngortitsisarneq.

Kommunimut 12. august 2004-mi imatut allappunga:

"Malugaara kommunip sulianik suliarinninnera qarasaasianik atuinikkut anner-tuumik ingerlanneqartarpoq. Aammattaaq suliani arlalinni malugaara kommunip suliami allattuiffiisa ilaannai suliani allagaatinut ilaasartut, sinnerilu qarasaasiamii-ginnartarlutik.

Kommuni qinnuigaara tamanna pillugu oqaaseqaateqaqqullugu. Kommuni tamatumunnga peqatigitillugu qinnuigaara suliami allagaatinik paasitinneqarnissaq qinutigineqartillugu tamanna qanoq iliorluni akuersaarneqartarnersoq nalunaarutigeqqullugu, suliami allagaatit suliamiinngitsut eqqarsaatigalugit."

Kommuni allakkatigut 10. december 2004-meersutigut imatut akivoq:

"K Kommuni allattukkanik qarasaasiakkut ingerlatsinermik 1. marts 2003-mi atuilersimammat assaannarmik allattukkat suliani inunnut ataasiakkaanut tunngasuni suli amerlasoorujussuususaapput.

Suliani allattukkat tamarmik siunissami qarasaasiakkoortuunissat siunertaavoq.

Immikkut pisariaqartitsisoqartillugu, soorlu allagaatinik paasitinneqarnissamik qinnuteqartoqartillugu, qarasaasiakkut allattukkat naqitanngortinneqartarput, suliamullu ikineqartarlutik, taamaaliornikkullu suliami ilaalersussaallutik, suliami paasissutissat allat assigalugit." (Atorfeqarfimmi nutsigaavoq)

Oqaaseqaatigigallakkakka:

"Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni nr. 9-mi, 13. juni 1994-imeersumi § 5, imm. 1-imi nr. 2-kkut makku aalajangersarneqarput:

"Paasitinneqarsinnaatitaanermi ilaatinneqarput journalinut, nalunaarsuiffinnut allattuiffinnullu allanut suliassamut pineqartumut tunngassuteqartunut ilanngullugit allattorneqartut."

Tamanna allagaatit qarasaasiakkut allattorneqartaraluarpataluunniit aamma atuuppoq, tak. § 5, imm. 2-mi oqaaseqatigiit kingulliit.

§ 5 pillugu oqaaseqaatinit makku ilaatigut aamma erserput:

"Allakkiaq oqartussamit qanoq ililluni toqqortarineqarnerat apeqqutaatinnagu paasissutissiisutigineqarsinnaatitaapput. Allakkiaq pineqartoq pappialanngorlugu toqqortarineqanngippat, assersuutigaluguli mikrofilminngorlugu imaluunniit qarasaasiap toqqorsivianiitillugu toqqortarineqarpat oqartussaasup allakkiaq paasitinneqarumalluni qinnuteqartumut pappialanngorlugu takuneqarsinnaasunngortittariaqarpaa, soorlu assersuutigalugu qarasaasiamit pappialamut nuullugu, imaluunniit pineqartumut allaffimmi tassani skærmikkut assilianngorlugu takuneqarsinnaasunngortillugu. ...

Imm. 1, nr. 2-mi aalajangersagaq manna tikillugu pisarnertut journalinut, nalunaarsuiffinnut allattuiffinnullu allanut suliassamut pineqartumut tunngassuteqartunut paasissutissiisinnaatitaaneq atuuppoq. ...

Journalitigut nalunaarsuiffiit il.il. taamaattut amerlanertigut suli "assaannarmik" suliarineqartarput. Teknikkikkulli ineriartornerup kingunerisaanik journalinut allattuineq il.il. qarasaasiat atorlugit ingerlanneqarsinnaaleriartorpoq. Taamaattumik journalinut qarasaasiat atorlugit allattorneqartartut paasissutissiisutigineqarsinnaanerat imm. 2-mi ilaatinneqarsinnaanngitsut pillugit aalajangersagaq apeqqutaatinnagu atortiinnarneqarpoq. ...

Imm. 2 malillugu nalunaarsuutitut allattuinerit il.il. qarasaasiaq atorlugu suliarineqartartut paasitinneqarsinnaatitaanermut ilaatinneqanngillat, taamaattorli tak. siuliani imm. 1, nr. 2-mut atatillugu taaneqartut. Aalajangersagaq nutaajuvoq, pisortanili oqartussat nalunaarsuiffii pillugit inatsisip nr. 294-ip 8. juni 1971-imeersup atortinneqarneranut atatillugu isigisassaalluni. Inatsimmi tassani pisortat al-laffeqarfiini qarasaasiatigut nalunaarsuiffiit inunnut ataasiakkaanut paasissutis-sanik imaqtut tamarmik ilaatinneqarput. ...

Imm. 1 nr. 2 tunngavigalugu paasitinneqarsinnaatitaanermi journalini ilanngus-at il.il. ilaatinneqarput. Tassani mianerinninnissami journalit qanoq ingerlan-neqarnerat apequtaatinneqanngilaq. ..."

Nalunaarsuutit naalakkersuisuni pisortat ingerlassaat pillugit inatsimmi nr. 294-imi, 8. juni 1978-imeersumi kapitali 4 inuit nalunaarsuiffimmiittut namminneq pillutik paasissutissanik paasiniaasinnaanerat pillugu malit-tarisassanik aamma imaqarpoq, kapitali 5-ilu paasissutissanik inuinnarnut ingerlatitseqqittarneq pillugu malittarisassanik imaqarluni.

Taamaattumik uanga paasinneqqaarnera unaavoq manna piumasaqaa-tigineqarsinnaasariaqartoq, tassalu allagaatit oqartussaasup suliarisi-masaasa imaluunniit oqartussaasup qarasaasiamit piffissaq sivikitsuarar-suaq atorlugu eqqoqqissaartumik naqitanngortissinnaasaasa assilineri oqartussaasup suliami toqqortarisassagai.

Allagaatinik toqqorterisarneq pillugu taaneqartut imm. 3-miittut aamma innersuussutigaaqka.

Tamakkua saniatigut allanik oqaaseqaatissaqanngilanga."

5. Piffissaq sulianik suliarinninnermut atorneqartoq.

Kommunimut 12. august 2004-mi imatut allappunga:

"Suliat misissorneqartut amerlanersaanni piffissani sivisuuni suliamik suliarin-ninneq ingerlanneqartarsimangilaq. Kommuni qinnuigaara siusinaartumik soraar-nerussutisiaqalernissamik qinnuteqaatit suliarineqarneranni piffissaq atorneqartar-toq pillugu ataatsimut oqaaseqaateqaqqullugu. Aammattaaq kommuni qinnuigaara kommuni eqqaasitseriaatsinik, suliat suliarineqarmatik uninngaannartannginnissaan-nik puigorneqartannginnissaannilluunniit qulakkeerisunik peqarnerseqqullugu."

Kommuni allakkatigut 10. december 2004-meersutigut imatut akivoq:

"Suliani siusinaartumik soraarnerussutisianut tunngasuni piffissap sulianik su-liarinninnermut atorneqartup sivisuup annertuumik sivikillisinneqarnissaa K Kom-munip eqqumaffigaa. Taamaattumik oqaatigineqarsinnaavoq K Kommunip periaa-seq aallartissimagaa, isumaginninnermik ingerlatsivimmi suliat pitsaassuseqartin-neqarnerannik qaffaanermik nassataqarsinnaasoq, taamaalillunilu suliaasaqarfiup taassuma pingaartinneqarnissaa eqqumaffigalugu.

Taamaattumik K Kommunip inatsisileritooq qanittukkat atorfinitsissimavaa isumaginninnermik ingerlatsiviup suliaasa pitsaassuseqartinneqarnerat qaffatsin-niarlugu, taamatuttaarlu ingerlatsineq pillugu inatsiseqartitsineq aamma suliasat suliarineqartarnerat pillugit pikkorissartitsinerit ilinniartitsinerillu isumaginninner-

mi ingerlatsinermi sulianik suliarinnittut peqataafigissallugit pisussaaffeqarfigisaat aallartinneqarniarlutik.

Aammattaaq eqqaasiteriaaseq siusinaartumik soraarnerussutisiaqalerumalluni qinnuteqaatit nutaat tamarmik nalunaarsorneqarfigisassa at isumaginninnermik ingerlatsiviup atulersimavaa. Suliat "pisoqqat" inaarneqanngitsullu (2002-mi taanalu sioqqullugu qinnuteqaatit) eqqarsaatigalugit manna atuuppoq, tassalu taakku eqqaasiteriaatsimi ingerlaavartumik malinnaavigineqassasut, taakkulu pingaarner-siuner-mi siulliutillugit suliarineqartassasut." (Atorfeqarfimmi nutsigaavoq)

Oqaaseqaatigallakkakka:

"Piffissaq oqartussaasut sulianik suliarinninnermut atortagaat pillugu ataatsimut malittarisassanik suliaasat suliarineqartarnerat pillugu inatsimmi aalajangersaasoqarsimanngilaq. Taamaattumik oqatussaasup sulianik suliarinninnerani piffissap akuerineqarsinnaasumik sivisussusillip qaqugukkut qaangerneqartarneranik apeqqut ataatsimoortumik akineqarsinnaanngilaq.

Aammattaaq piffissamik oqartussaasup suliamik suliarinninnermut atugaanik naliliiner-mi, piffissap suliamik suliarinninnermut ator-neqartup tamarmiusup saniatigut, pissutsit allat ilanngullugit isiginiarneqartariaqarput, matumani suliap suussusia, misissuinerit oqartussaasup ingerlassaasa annertussusiat, piffissaq suliamik suliarinninnermut nalinginnaasumik ator-neqartartoq kiisalu suliami ingerlaavartumik iliuseqarnerit ilanngullugit isiginiarneqartariaqarlutik. Aammattaaq suliap suliami il-lua tungiusup imaluunniit namminersortut pisortalluunniit soqutigisaat eqqarsaatigalugit annertunerusumik annikinnerusumillunniit nukingiut-tariaqartuunera pingaaruteqartillugu isiginiarneqassaaq.

Aamma oqaatigaara suliaasat suliarineqartarnerat pillugu inatsit pil-lugu Namminersornerullutik Oqartussat ilitersuusuaanni imm. 199-imit ilaatigut makku ersertut:

"199. Suliaasat tamarmik pisortat ingerlatsiviinit suliarineqartut soorunami sapinngisamik pisariitsumik, sukkasuumik aningaasartuutaavallaanngitsumillu suliarineqartarnissaannik piimasaqaat pingaartumik atuuppoq suliaasanut inuit ataasiakkaat imaluunniit namminersorlutik ingerlatseqatigiiffiit, suliffeqarfiit, peqatigiiffiit il.il. attuumassuteqarfigisaanni."

Oqaaseqaataagallartumut matumunnga ilanngussatut takussutissiaq ilanngullugu nassiuppara, taassumalu piffissaq kommunimi suliat ataasiakkaat suliarineqarnerannut ator-neqartartoq takutippaa, siusinaartumik qinnuteqaatip ullulernerarneranit (ullormit qinnuteqaatip aallartiffiatut tunngaviutinneqartumit) kommunip suliamik inaarsinerata tungaanut naatsorsorlugu. Suliaq inaarlugu suliarineqarsimanngippat piffissaq suliamik suliarinninnermut ator-neqartartoq 13. juni 2005 tikillugu naatsorsorneqartarpoq.

Tassannga erserpoq suliat inaarlugit suliarineqarsimasut eqqarsaatigalugit K Kommunip suliani siusinaartumik soraarnerussutisianut tun-

ngasuni misissorneqartuni piffissaq sulianik suliarinninnermut atortagaa agguaqatigiissitsinermi ullunik 719-inik sivilissuseqartoq. Suliat inaarlugit 13. juni 2005-mi suliarineqarsimannngitsut eqqarsaatigalugit piffissaq sulianik suliarinninnermut atorneqartartoq agguaqatigiissitsinermi ullunik 914-inik sivilissuseqarpoq, tassa ukiut marluk, qaammatit arfinillit ullorlu ataaseq. Tamanna piffissatut suliamik suliarinninnermut atorneqartutut pisariaqannngitsumik sivilisualaatut isigaara, K Kommunilu qinnuigaara tamanna pillugu oqaaseqaateqaqqullugu. Kommuni tamatumunnga peqatigitillugu qinnuigaara piffissaq sulianik suliarinninnermut atorneqartartoq naammaginartumik sivilissuseqartoq kommunip paasinninnera malillugu qanoq sivilisutigisariaqartutut isigineqarnersoq nalunaarutigeqqullugu tunngavilersoqqullugulu, ilaatigut qinnuteqaatit sulinermik misiliititsinertaqannngitsumik aalajangiivigineqarsinnaasut, ilaatigullu qinnuteqaatit sulinermik misiliititsereerluni aatsaat aalajangiivigineqarsinnaasut eqqarsaatigalugit.

Oqaatigaarattaaq suliassat suliarineqartarnerat pillugu inatsit pillugu Namminersornerullutik Oqartussat ilitsersuutaanni imm. 205-imit 207-imit makku oqaatigineqarmata:

"205. Ingerlatsinermut oqartussaasup suliassap suussusia pissutigalugu imaluunniit oqartussaaffimmi tassani suliassat nalinginnaasumik suliarineqartarnerat pissutigalugu suliassaq tigungeraniit piffissap sivikinnerusup iluani aalajangiivigisinnaanngikkuniuk oqartussaaffiup suliamut tunngassuteqartoq nalunaarfigisariaqarpaa suliassap qanoq inissisimaneramik aammalu ajornanngippat paasissutisillugu suliassap qaqugu aalajangiivigineqarnissaa oqartussaaffimmit naatsorsuutigineqarnersoq.

206. Oqartussaaffiup aammattaaq suliassamut tunngassuteqartoq ilisimatittariaqarpaa suliassaq sivikinnerusumik suliarineqartussaagaluaq immikkut pissuteqartumik pisarnermit sivilisunerusumik suliarineqartariaqalerpat.

207. Suliamut tunngassuteqartumit allakkat nukingisaarutit suliassallu suliarineqarneranni piffissamik atorneqartumik naleqquttumik tunngavilersukkat ingerlaannartumik akineqartariaqarput. Akissuteqaammi ilisimatitsissutigineqartariaqarpoq suliassaq qanoq inissisimanerseq aammalu ajornanngippat ilisimatitsissutigineqarluni suliassap aalajangiivigineqarnissaa oqartussaaffiup qaqugu naatsorsuutigineeraa."

Taamaalilluni suliaq oqartussaasup suliami pineqartumi (nukingisaari-soqarsimappat nukingisaarummut akissutitut) suliami illua tungiusumut oqaatigisaanit sivilisunerussappat suliami illua tungiusumut nalunaaruteqarnissamut pisussaaffeqaannangilaq, aammali suliap suliarineqarnera suliami illua tungiusup tungaanit isigalugu naatsorsuutigineqarsinnaasumit sivilisunerussappat suliami illua tungiusumut nalunaaruteqarnissamut pisussaaffeqarpoq. Taamaalilluni oqartussaasup manna naliliiffigisariaqarpaa, tassalu suliap pineqartutut ittup suliarineqarneranut piffissaq qanoq sivilisutigisoq atorneqassasoq suliami illua tungiusup naatsorsuutigisinnaaneraa, piffissarlu taanna naappat suliami illua tungiusoq ilisimatillugu suliap suliarineqarnera sivilisuloorunneqartoq, ajornanngip-

pallu ilisimatitsissutigalugu suliap inaarlugu qaqugu suliarineqarnissaa naatsorsuutigineqarsinnaanersoq.

Suliat misissuininnut ilaatinneqartut arlaannaanniluunniit K Kommuni immikkoortut 205, 206 aamma 207 naapertorlugit ilisimatitsisarsimangi- laq. Tamanna uanga paasinneqqaarnera malillugu pitsaanngitsuvoq.

Maluginiarpara eqqaasiteriaaseq siusinaartumik soraarnerussutisia- qalerumalluni qinnuteqaatit nutaat tamarmik ingerlaannartumik nalu- naarsorneqartarfiat K Kommunip atulersimagaa. Suliat inaarlugit suliarineqarsimangitsut eqqaasiteriaatsimi aamma taamatut ingerlaavartumik malinnaavigineqarniarput. K Kommuni qinnuigaara eqqaasiteriaaseq atorneqalersimasoq pillugu erseqqinnerusumik nassuiaateqaqqullugu.

Piffissaq kommunip sulianik suliarinninnermut atortagaa eqqarsaatiga- lugu siusinnerusukkut suliani ataasiakkaani kommunip sulianik piffissami sivisunerusumi (X pillugu suliami ukiumi ataatsimi qaammatinilu arfineq marlunni) suliamik suliarinninnermi iliuuseqarfiumngitsunik uninngatitsi- sarsimanera isornartorsiorpara, kiisalu suliat suliamik suliarinninnermik iliuuseqarfineqarnatik piffissani arlalinni (qaammatini sisamani, qaam- matini tallimani, qaammatini tallimani, qaammatini marlunni aamma qaammatini arfineq marlunni, matumani suliat Y-mut uanga j. normunnik ...-mik normoqartumut tunngasoq aamma suliaq Z-imut uanga j. normun- nik ...-mik normoqartumut tunngasut innersuussutigaa) qinnuteqartoq tamatuminna ilisimatinnagu uninngatinneqartarsimanerat isornartor- siorlugu."

Oqaaseqaatigigallakkannut kommunip oqaaseqaatai 3. november 2005- imi tiguakka. Oqaaseqaatinit taakkunanga makku erseerput:

"...

Siusinaartumik soraarnerussutisianik qinnuteqaatit suliarineqarnerinut piffissap siviisuup atorneqartarsimanera K Kommunip nalunnigilaa. Akissutinit 10. december 2004-meersunit erseerpoq suliassaqarfimmi tassani suliassarpassuaqarsimasoq suli suliarineqanngitsunik, tamannalu K Kommunip soorunalimi ajuusaarutigaa. Sulias- sat taakku naammassiniarlugit aallartinneqarsimapput, taamaattumillu siunissami qinnuteqaataasarumaartussat suliarineqarnerannut piffissaq atorneqartoq pisut atuuttut pisortanilu oqartussaasunik allanik suleqateqarneq aallaavigalugu sivikin- nerulissalluni.

K Kommuni isumaqarpoq qinnuteqartup siusinaartumik soraarnerussutisiaqarta- riaqarnera erseqqippat piffissaq suliamik suliarinninnermut atorneqartoq naliliilluni qaammatinik pingasunit sisamanut naammaginartumik siviussuseqarsinnaasoq. Qinnuteqartoq siusinaartumik soraarnerussutisiaqalersinnaanersoq nalornissutigi- neqarpat, piginnaanngorsaaqqittoqassappat sulinermillu misiliisitsisoqassappat pif- fissaq suliamik suliarinninnermut atorneqartoq qaammatinik qulingiluanit 18-inut siviussuseqartoq naammaginaruussaaq. Taamattorli tamanna pillugu oqaatigine- qassaaq suliani assigiinngitsuni piffissap suliamik suliarinninnermut atorneqartup qanoq siviutiginissaanik naliliinerit ataasiakkaat qinnuteqartullu suleqataanissa- minut piumassuseqarnera apequtaassasut, taamaattumillu piffissaq sulianik suliarinninnermut atorneqartoq qanoq siviutigissasoq eqqoqqissaartumik oqaatigi- neqarsinnaanani.

saliunneqarsimanngimmata, allagaatinilli paasitinneqarnissamik qinnuteqaatit akineqarnissaat eqqarsaatigalugu tamanna atuummat."

6. Suliat uppersaasorsorneqartarnerat.

Kommunimut 12. august 2004-mi imatut allappunga:

"Suliani arlalinni maluginiarpara suliamik suliarinninneq allattuiffimmi allanneqarsimasoq pillugu suliami uppersaatissiisoqartarsimanngitsoq. Kommuni qinnuigaara tamanna pillugu oqaaseqaateqaqqullugu.

Kommuni tamatumunnga peqatigitillugu qinnuigaara allakkat takkuttut kommunip qanoq annertutigisumik nalunaarsortarnerai nalunaarutigeqqullugu, matumani siusinaartumik soraarnerussuteqalernissamik qinnuteqaatit allakkatut takkuttut nalunaarsorneqartarnerai ilanngullugu eqqarsaatigalugu."

Kommuni allakkatigut 10. december 2004-meersutigut imatut akivoq:

"Suliami allagaatit uppersaasiussat ilanneeriarlutik tammartarnerat isumaginninnermik ingerlatsiviup nassuerutigalugulu ajuusaarutigaa. Pisut amerlanersaanni tamatumunnga pissutaasartoq tassaavoq allagaatit allaqqaarnerisa sulianit inunnut ataasiakkaanut tunngasunit immikkoortinneqartarsimanagerat. Suliami allagaatinik immikkoortitsisarnermi periaaseq oqaatigineqartutut sulianik suliarinnittunut sakkortuumik erseqqissarneqarsimavoq.

Aammattaq oqaatigineqarsinnaavoq allakkat K Kommunimit tiguneqartut tamarmik ullormit ullormit allaffiup iluani atugassatut allakkat pillugit allattuiffinni nalunaarsorneqartarmata. Taamaattorli siusinaartumik soraarnerussutisiaqalerumalluni qinnuteqaatit allakkatut isertutut nalunaarsorneqarneq ajorput, tassami qinnuteqarnermi immersugassat allakkanut ilaatillugit tiguneqartanngimmata.

Siusinaartumilli soraarnerussutisiaqalerumalluni qinnuteqaatit tiguneqartarnerinut periaaseq alla isumaginninnermik ingerlatsiviup atulersimavaa, tassami qinnuteqaatit tamarluinnangajammik ornigulluni saaffiginninnikkut pisarmata. Taamaalliluni siusinaartumik soraarnerussutisiaqalerumalluni qinnuteqartoqarnerani qinnuteqartoq qinnuigineqartarpoq qinnuteqarnermi immersugassaq tungujortoq atsioqqullugu, taannalu siusinaartumik soraarnerussutisiaqalerumalluni qinnuteqaatinut suliamik immikkut suliarinnittumut ingerlaannartumik tunniunneqartarpoq, suliareq-qitassanngortillugu.

Aammattaq isumaginninnermik ingerlatsiviup periaaseq atulersinniarlugu masakkut suliniutigaa, tassalu siusinaartumik soraarnerussutisiaqalerumalluni qinnuteqaatit tunniunneqarnerani uppersaatip qinnuteqartumut tunniunneqartarnera.

Qinnuteqaatip suliareqqitassanngortillugu ingerlateqqinneqarnera tamatumunngalu uppersaat suliami allattuiffimmi allattukkanit sapinngisamik takuneqarsinnaasussaapput. Periaaseq taanna sulianik suliarinnittunut erseqqissarneqarniarpoq.

Isumaginninnermik ingerlatsiviup naliliinera unaavoq siusinaartumik soraarnerussutisiaqalerumalluni qinnuteqaatinik tiguneqartunik nalunaarsuineq periaatsip taassuma naammattumik qulakkeersinnaagaa.

Siusinaartumik soraarnerussutisiaqalerumalluni qinnuteqaat allakkatigut nassiunneqarpat taanna allakkatut isertutut kommunip iluani allakkanik nalunaarsuiffittut atorineqartussami nalunaarsorneqassaaq." (Atorfeqarfimmi nutsigaavoq)

Oqaseqaatigigallakkakka:

"Suliami allagaatinik immikkoortitsisarneq" pillugu qulaani immikkoortoq 3-mi K Kommunip suliani inunnut ataasiakkaanut tunngasuni allagaatinik immikkoortitsisarnermi siusinnerusukkut periaaserisimasaa pillugu paasinninnera nassuiarpara.

K Kommunip akissutaa imatut paasivaara suliani uppersaasiussatut allagaatit ilaanneeriarlutik tammartarsimasut.

Allagaatip ataatsip allagaatilluunniit ataatsiakkaat qaqutigooraluarumik tammaaneqarsinnaanerat, taamalillutillu suliami allagaatit akornanni nassaarineqarsinnaasanninnerat paasisinnaavara.

Uanga paasinneqqaarnera unaavoq allagaatit sulianit uteqqiattumik tammartarnerat ingerlatsivimmi oqartussaasup paasiguniuk periaatsit tunaartarisassalluunniit allagaatit tammartanninnissaannik tammaaneqartanninnissaannilluunniit qulakkeerisut atulerniarlugit suliniuteqartariaqartoq.

Suliami allattuiiffimmut allattuisarnermi siunertanut ilaasoq tassaavoq suliap pilertortumik pullavigineqarsinnaanera, kiisalu suliap allagaatinik sunik imaqarnerata takuneqarsinnaanera.

Taamaattumik uanga paasinneqqaarnera malillugu manna pitsaanngit-sorujussuuvoq, tassalu suliani arlalinni allagaatit suliami allattuiiffimmi nalunaarsorneqarsimasut suliami namminerme nassaassaanninnerat. Aammattaaq paasinneqqaarnera unaavoq suliami allattuiffiup naleqassusiata ilaa tamatuma peeraa.

K Kommunip allagai imatut paasivakka allakkat tiguneqartut tamarmik allattuiiffinnut kommunip allaffiata iluani atugassatut ullut tamaasa nalunaarsorneqartartut. Taamaattorli tamanna siusinaartumik soraarnerussutisiaqalerumalluni qinnuteqaatinut atuutinngilaq, tassami taakku allak-katigut tiguneqarajunngimmata. Periaatsimik qinnuteqaatip tiguneqarne-ranut uppersaammik tunniussiviusartumik qinnuteqaateqartoqartillugu tiguneqarneranik allattuiiffimmut allattuiiffiusartumik atulersitsiniarneq K Kommunip massakkut suliniutigaa. Siusinaartumik soraarnerussutisiaqalerumalluni qinnuteqaatit allakkatigut tiguneqartut eqqarsaatigalugit periaatsit oqaatigineqartoq imatut paasivara taakku allakkatut tiguneqartutut nalunaarsuiiffimmi allaffiup iluani atorineqartussami nalunaarsorneqartartut.

Tamanna pillugu oqaatigaara uanga tunginnit isigalugu manna naleqqunnerpaassagaluartoq, tassalu siusinaartumik soraarnerussutisiaqalerumalluni qinnuteqarnermi immersugassat tiguneqartut tamarmik allakkatut tiguneqartutut nalunaarsuiiffimmi allaffiup iluani atorineqartussami nalunaarsorneqartarpata. Qinnuteqarnermi immersugassat allakkatigut nassiunneqartut aamma qinnuteqarnermi immersugassat kommunip allaffianut ornigulluni saaffiginninnermi tunniunneqartut assigiinngissuteqarnissaat uanga paasisinnaanngilara. Taakku marluk allagaataapput

suliami avataanit qinnuteqaatitut ilaasut. Tassani aamma ilaavoq qinnuteqarnermi immersugassat suliami allagaatinut ilaasut allakkatigut nassiunneqarnertik imaluunniit kommunimi immersorneqarnertik apeqqutaatinagu uanga paasinninnera malillugu suliap allattuiffittaani nalunaar-sorneqartariaqarnerat.

Tamakkua saniatigut oqaatigaara pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni nr. 9-mi, 13. juni 1994-imeersumi § 6, imm. 1 allattuisussaataaneq pillugu malittarisassamik imaattumik imaqartoq:

"§ 6. Suliassani ingerlatsineranut oqartussaasunit aalajangiiffigineqartussani oqartussaq paasissutissanik suliassanut tunngassuteqarluinnartumik suliassap aalajangiiffigineqarnissaanut pingaaruteqartunik oqaasiinnakkut pissarsisoq, paasissutissanilluunniit taamaattunik allatut iliorluni paasisaqartoq paasissutissat taakku imaat pillugit allakkiussaaq. Taamaattorli paasissutissat taakku suliassap allakkiartaasa ilaanni takuneqarsinnaappata tamanna atuutinngilaq."

Aalajangersakkamut tassunga tunuliaqutaasoq tassaavoq ingerlatsiviup nammineq suliniuteqarnermigut aalajangiinermi allakkatigut tunngaviusussanut ilassutissanik oqaasiinnartigut paasissutissanik pissarsiniartarnerata qaqtigoortuunnginnera. Taamaalilluni § 6-ikkut aalajangersarnejarpoq ingerlatsivimmi oqartussaasup suliami pissusiviusut pillugit paasissutissanik suliap aalajangiivigineqarneranut pingaaruteqartunik oqaasiinnartigut pissarsisup, imaluunniit paasissutissanik taamaattunik allatut iliorluni ilisimasaqalersup paasissutissat taakku imarisaat pillugit allakkiussasoq.

Paasissutissap allanneqarnissaanut aalajangiisuusoq tassaavoq paasissutissaq suliap uppernarsaasersuinikkut tunngaviinut tapertaanersoq imaluunniit suliami pissusiviusut eqqarsaatigalugit erseqqissuutitsineq anguniarlugu pissarsiarineqarsimanersoq. § 6 malillugu allattuisussaataaneq suliami pissusiviusut pillugit paasissutissanut suliami allagaatini ilaariinngitsunut tamanut atuuppoq, paasissutissat suliamut qanoq ililluni pissarsiarineqarnerat apeqqutaatinnagu. Paasissutissat suliami illua tunngiusumit namminermi oqaasiinnartigut nalunaarutigineqartut pillugit aamma allakkiortoqassaaq."

7. Allagaatinik ullulersuisarneq.

Kommunimut 12. december 2004-imi imatut allappunga:

"Sulianik arlalinnik peqarpoq allakkianik, naliliinernik inassuteqaatinillu ullulernerqanngitsunik imaqartunik. Kommuni qinnuigaara tamanna pillugu oqaaseqaa-teqaqqullugu."

K Kommuni allakkatigut 10. december 2004-meersutigut imatut akivoq:

"Allakkat tamaasa, matumani qarasaasiakkut allakkat ilanngullugit eqqarsaatigalugit, ullulerneqartarnissaat allattuiffinnilu allaffiup iluinnaani atorneqartussani allakkatut isertutut nalunaarsorneqartarnissaat siunertaavoq.

Taamaattumik allagaatit tamarmik ullulerneqartarnissaat isumaginninnermik ingerlatsiviup anguniarpaa, nassuerutigaluguli suliassaqarfimmi tassani ajornartorsiuteqartoqartoq. Taamaattumik tamanna sulianik suliarinnittunut sakkortuumik erseqqissarneqarniarpoq." (Atorfeqarfimmi nutsigaavoq)

Oqaaseqaatigigallakkakka:

"Allagaatip allaffiup iluinnaani atugassap ullulerneqarnerata allagaatip qanga suliarineqarsimamera takutippaa. Taamaalilluni allagaatip pineqartup ullulerneqarnera atorlugu naliliisoqarsinnaavoq pisoq pineqartoq allagaatip suliarineqarnerani ilanngullugu isiginiarneqassanersoq, imaluunniit tamanna piffissaq eqqarsaatigalugu pisinnaannginnersoq. Inassuteqaatip imaluunniit naliliinerup qangameersuunera ilisimassallugu suliameerit aalajangiisussamat pingaartumik inassuteqaatit, naliliinerit ilaalu ilanngullugit eqqarsaatigalugit, tassalu pisutsit piffissap ingerlanerani allanngorsinnaasut eqqarsaatigalugit. Taamaattumik allagaatit arlallit ullulerneqartarsimanninnerat pitsaanngitsuuvoq.

Malugaara kommunip tamanna sulianik suliarinnittunut erseqqissarniaaraa, taamaattumillu matuma kingornatigut annertunerusumik iliuuseqaqqissanngilanga."

8. Oqariartaatsinik atuineq.

Kommunimut 12. august 2004-mi imatut allappunga:

"Suliani arlalinni allattuiffinni oqariartaatsit oqaasertalersuinerillu naammattoortarpakka, assersuutigalugu imaattut: "Konen var skidefuld, og jeg smed hende ud" imaluunniit pilersuisussaatitaaneq pillugu oqallinneq: "Nej. Gik i vred. Vil myrde sin samlever".

Kommuni qinnuigaara oqariartaatsinik atuineq pillugu oqaaseqaateqaqqullugu."

Kommuni allakkatigut 10. december 2004-meersutigut imatut akivoq:

"Isumaginninnermik ingerlatsiviup naatsorsuutigaa suliameerit allakkatit oqaatsit toersut kinaassusersiunngitsullu atorlugit allanneqartassasut. Ajornartorsiut taanna isumaginninnermik ingerlatsiviup eqqumaffigaa, tamannalu sulianik suliarinnittunut erseqqissarniarlugu. Aammattaaq isumaginninnermik ingerlatsiviup periaaseq aallartissimavaa, taannalu malillugu inassuteqaatit tamarmik misissorneqartassapput, taamaalillutik allakkatit taamaattut oqaasertaat allanngortinneqartassallutik, inassuteqaatit ataatsimiititaliami suliarineqartussanngorlugu ingerlateqqinneqannginnerani." (Atorfeqarfimmi nutsigaavoq)

Oqaaseqaatigigallakkakka:

"Isumaqarpunga ingerlatsinermi ileqqorissaarnermut naapertuunnerpaasoq ingerlatsiviup allakkiai/inassuteqaatai qinnuteqartoq taassumaluunniit pissusilersornera eqqarsaatigalugu misigissutsinik akoornagit suliarineqartarpata, taamaalilluni allakkiamik allattup kinaassusersiunginnera qularutigineqarsinnaajunnaarsillugu. Tamatuma pissuseqataa matumunnga atuuppoq, tassalu ingerlatsiviup avammut allagai sapinngisamik inussiarnerpalaartumik, mianerinnippalaartumik akuersaarpalaartumillu oqaasertalersorneqartassasut."

9. Piffissaq soraarnerussutisiaqalerfik.

Kommunimut 12. august 2004-mi imatut allappunga:

"Kommunip suliaataanik misissuininni paasivara piffissaq siusinaartumik soraarnerussutisianik tunniussiviususaaq nalornissutigineqartarsimasooq. Isumaqarpunga illua'tungaani soraarnerussutisiat pillugit peqqussummi § 7-ip aamma illua'tungaani peqqussutissatut siunnersuut pillugu oqaaseqaatit Ilaqutariinnermullu Pisortaqarfiup peqqussut pillugu ilitersuutaata akornanni naapertuutinngineqartoq. Taamaattumik Ilaqutariinnermut Pisortaqarfiup malittarisassat qanoq paasineqarnissaannik nassuiaanerani misissuiffiginneq aallartippara.

Ilaqutariinnermut Pisortaqarfik tamatumunnga atatillugu malittarisassat qanoq paasineqarnissaannik nassuiaanera pillugu tusarniaavigaara.

Ilaqutariinnermut Pisortaqarfik allakkatigut 24. august 2004-meersutigut akivoq peqqussummi § 7-ip aamma aalajangersakkap piareersarneqarnerani suliat immiinnut naapertuuttuunnginnerat pisortaqarfiup isumaqatigigaa, kiisalu Inatsisartut ataatsimiinnissaanni tulluuttumi pisortanit pensionisiat pillugit Inatsisartut peqqusutaanni § 7-ip allanngutissaatut siunnersuut pisortaqarfiup saqqummiunniaraa.

Pisortaqarfiup allakkani 26. januar 2005-imeersuni aamma oqaatigaa pisortaqarfiup paasinninnera unaasoq siusinaartumik soraarnerussutisiat piffissaq soraarnerussutisiaqassagaanni piumasqaatinik eqqortitsiviusooq aallarnerfigalugu pi-sartagarilersinneqassasut, kiisalu pisortaqarfiup paasinninnera unaasoq piumasqaatit aatsaat eqqortinneqarsimassasut qinnuteqartoq kommunip piginnaanngorsaq-qinniartlugu misilereersimappagu, pineqartup piginnaanngorsaaqqinnerup kingornatigut suliamik ingerlatsinissaminut periarfissaqanera ilimannangippat.

Pisortaqarfiup paasissutissiissutigisai tusaatissatut tiguakka. Taamaattorli malugaara Inatsisartut 2005-imi upernaakkut ataatsimiinneranni Inatsisartut peqqusutaanni § 7-ip allanngutissaatut siunnersuummik suliarinnittoqarsimanngitsoq.

10. Suliffissarsiuussisarfirmut nalunaaruteqartussaataaneq pillugu a-peqqut.

Kommunimut 12. august 2004-mi imatut allappunga:

"Sulianit arlalinnit erserpoq qinnuteqartoq qinnuigineqartoq siusinaartumik soraarnerussutisialeqarnissamik qinnuteqaatip tunniunneqarnerata kingornatigut suliffissarsiuussisarfirmut "naqitsikkiartoqqullugu".

Kommuni qinnuigaara tamatumunnga pissutaasoq nalunaarutigeqqullugu, kiisalu qinnuteqartup sulilenera soraarnerussusiaqalernissamik qinnuteqaammut kingunerarsinnaasoq qinnuteqartumut tamatumunnga peqatigitillugu ilitsersuutigineqartarnersoq nalunaarutigeqqullugu."

Kommuni allakkatigut 10. december 2004-meersutigut imatut akivoq:

"Inatsisartut peqqussutaanni nr. 9-mi, 15. april 2003-meersumi § 10, imm. 1 tunngavigalugu siusinaartumik soraarnerussutisiaqalersitsinissami piumasaqaataavoq inuussutissarsiorsinnaassuseq timikkut, eqqarsartaatsikkut inooqataanikkulluunniit pissutsit pissutigalugit ataavartumik appariarsimassasoq. Aammattaaq siusinaartumik soraarnerussutisiaqalersitsisoqassappat piumasaqaataavoq qinnuteqartoq piginnaanngorsaaqqinniarlugu misiliisoqarsimassasoq, tamanna pillugu Inatsisartut peqqussutaat malillugu, tak. soraarnerussutisiat pillugit peqqussummi § 10, imm. 2.

Taamaattumik piginnaanngorsaaqqinnermut atatillugu pissusissamisooruuvog qinnuteqartoq suliffissarsiuussisarfimmut attaveqarnerminik attassiinnarnissaanik kajumissaassallugu.

Aammattaaq siusinaartumik soraarnerussutisiaqalerumalluni qinnuteqartoq suliamik suliarinninnerup nalaani suliffiullu naleqquttup innersuunneqarsinnaalernissaata tungaanut pisortanit ikiorsiissutit pillugit Inatsisartut peqqussutaat nr. 10, 1. november 1982-imeersoq tunngavigalugu ikiorserneqarnissamik amerlanertigut pisariaqartitsisartussaavoq. Peqqussut taanna malillugu ikiorserneqassagaanni ilaatigut piumasaqaataavoq pineqartoq suliffimmik naleqquttumik pisariaqarnera naapertorlugu innersuunneqarsinnaanngitsoq, tak. § 13, nr. 1. Uppernarsaasersuinissamik piumasaqaat kommunimi imatut eqqortinneqartarpoq, tassalu pineqartup suliffissarsiuussisarfimmi suliffissarsiortutut "naqissusertinneqarneratigut", sulisinnaannginnermut nakorsap uppernarsaasiussaa takutinneqarsinnaanngippat.

Taamaalilluni siusinaartumik soraarnerussutisiaqalerumallutik qinnuteqartut suliffissarsiortutut "naqissusertinneqarnissaat" piumasaqaatigineqarneq ajorpoq, kiisannili siusinaartumik soraarnerussutisiaqalerumalluni qinnuteqaatip suliarineqarnerata nalaani pisortanit ikiorsiissutit pillugit Inatsisartut peqqussutaat tunngavigalugu ikiorserneqarnissamik qinnuteqartoqartillugu sulisinnaannginnermullu uppernarsaat takutinneqarsinnaanngikkaangat tamanna piumasaqaatigineqartarpoq.

Suliffeqarnerup kingunerisinnaasai pillugit ilitsersuineq pillugu apeqqut eqqarsaatigalugu oqaatigineqarsinnaavoq qinnuteqartup piginnaanngorsaaqqinneqarnera asuliinnassasoq erseqqeriinngippat qinnuteqartup piginnaanngorsaaqqinniarlugu misilinneqarnera suliamik suliarinninnermi aalajangersimasumik ilaasoq.

Qinnuteqartoq tamatumunnga atatillugu oqarfigineqartarpoq sulinermik misilii-neq/piginnaanngorsaaqqinneq qinnuteqartup sulisinnaassuseqarneranik takutitsip-pat tamatuma kingunerissagaa siusinaartumik soraarnerussutisiaqalerumalluni qinnuteqaatip inuussutissarsiorsinnaassutsip ataavartumik appariarsimasutut isigineqarsinnaannginnera tunngavigalugu itigartinneqarnera." (Atorfeqarfimmi nutsigaa-voq)

Oqaaseqaatigallakkakka:

"K Kommunip oqaatigaa: "Taamaattumik piginnaanngorsaaqqinnermut atatillugu pissusissamisooruuvog qinnuteqartoq suliffissarsiuussisarfimmut attaveqarnerminik attassiinnarnissaanik kajumissaassallugu." (Atorfeqarfimmi nutsigaavoq)

Tamanna pillugu oqaatigaara pisortanit pensionisiat pillugit Inatsisartut peqqussutaanni § 10, imm. 2-kkut aalajangersarneqarmat siusinaartumik soraarnerussutisiaqalersitsinnginnermi kommunip pineqartoq piginnaangorsaaqqinniarsimassagaa, piginnaangorsaaqqinnissamut ikiorsiisarneq pillugu Inatsisartut peqqussutaat tunngavigalugu.

Piginnaangorsaaqqinnissamut ikiorsiisarneq pillugu Inatsisartut peqqussutaanni nr. 4-mi, 31. maj 2001-imeersumi aalajangersarneqarpoq kommunu tassaasoq piginnaangorsaaqqinneqartoq suleqatigalugu piginnaangorsaaqqinneq pillugu pilersaarummik suliaqartussa. Taamatutaaq piginnaangorsaaqqinnerup piareersarneqarnissaa kommunip pisussaaffigaa, taamaalilluni taanna piffissap sapinngisamik sivikinnerpaap iluani ingerlanneqarsinnaaqqullugu.

Peqqussummi tassani § 2-mit makku erseerput:

"§ 2. Piginnaangorsaaqqinnissamut ikiorserneqartassapput inuit peqqissutisimut tunngasut, inuttut atugarisanut tunngasut, tamatumani ilanngullugit siviisuumik suliffissaarusimaneq, sumiiffimmi pissutsinut tunngatillugu inuttut ilaqutariittulluunniit artorsaateqarnerit pissutigalugit imaaliallaannarlugit sulilernissamut naleqqussarneqarsinnaanngitsut imaluunniit naleqqussaaqqinneqarsinnaanngitsut. Inuk ikiorserneqarsinnaatitaasoq taaneqartarpoq piginnaangorsaaqqittussa.

Imm. 2. Piginnaangorsaaqqinnissamut qinnuteqartup pisussaaffigaa inuttut atugarisanut tunngasut peqqissutsimullu tunngasut qulaajarneqarnissaat peqataaffigissallugu piginnaangorsaaqqinnissallu aallartinnissaanut aalajangiinnissamut paasissutissanik pingaaruteqartunik tunniussinissaq tamakkiisumik pisussaaffigalugu."

Aamma oqaatigaara kommunip pisuni tamani manna isumaliutersuutigisariaqaraa, tassalu inuk siusinaartumik soraarnerussutisiaqalerumalluni ilumut qinnuteqartariaqarnerisooq, imaluunniit inuk qinnuteqarnissamut taarsiullugu piginnaangorsaaqqinnermut ikiorsiisarneq pillugu Inatsisartut peqqussutaat tunngavigalugu piginnaangorsaaqqitassanngorlugi innersuunneqassanersooq, imaluunniit nalinginnaasumik suliffissarsioqqullugu innersuunneqassanersooq.

Taamaalilluni periaaseq pingasoqiusanik sammiveqartoq pineqarpoq, taakkunanilu sulilersitsiniarneq siulliullugu misilinneqartussaalluni. Suliffeqarnermut tunngasunut naleqqussaasoqarsinnaangippat tulliullugu piginnaangorsaaqqinnermut ikiorsiisarneq pillugu Inatsisartut peqqussutaat tunngavigalugu piginnaangorsaaqqinniartoqartariaqarpoq, aatsaallu piginnaangorsaaqqittoqarsinnaanngippat siusinaartumik soraarnerussutisiaqalerumalluni qinnuteqartoqartariaqarluni, siusinaartumik soraarnerussutisiaqalersitsineq ingerlaannartumik pisinnaanngippat, tak. pisortanit pensionisiat pillugit Inatsisartut peqqussutaanni § 10.

Taamaattumik pineqartup siusinaartumik soraarnerussutisiaqalerumalluni qinnuteqarneranut peqatigitillugu suliffissarsiussisarfirmut attave-

qarneq eqqarsaatigalugu kommunip tunngavilersuutaa paasiumaatsip-para.

Kommuni qinnuigaara manna pillugu nassuiaateqaqqullugu, tassalu siusinaartumik soraarnerussutisiaqalerumalluni qinnuteqaatip suliarineqannginnerani tunniunneqannginneranilu qinnuteqartoq kommunip ataatsimeeqatigisarneraa, allatigut ikiorserneqarnissamik qinnuteqarnani siusinaartumik soraarnerussutisiaqalerumalluni qinnuteqarneq naleqquttuunersoq qinnuteqartumut ilitsersuutiginiarlugu.

Kommuni aamma qinnuigaara manna paasissutissiisutigeqqullugu, tassalu siusinaartumik soraarnerussutisiaqalerumallutik qinnuteqartut piginnaangorsaqqinneqarumallutik qinnuteqarnissaannut qanoq annertutigisumik kommunip innersuuttarnerai. Aammattaaq kommuni qinnuigaara siusinaartumik soraarnerussutisiaqalerumalluni qinnuteqaat akuerineqarsinnaanngitsoq erseqqippat qinnuteqaat kukkusumik nassiunneqarsimasutut assersuutigalugu piginnaangorsaqqinneqarnissamik qinnuteqaatit ingerlateqqittarneraa paasissutissiisutigeqqullugu."

Oqaaseqaatigigallakkannut K Kommunip oqaaseqaatai 3. november 2005-imi tiguakka. Oqaaseqaatinit taakkunannga makku erserput:

"...

Siusinaartumik soraarnerussutisiaqalerumalluni qinnuteqaammut atatillugu qinnuteqartup sulineramik misiliisinneqarnissaa inatsisikkut piumasaqaataavoq, tak. pisortanit pensionisiat pillugit Inatsisartut peqqussutaanni nr. 9-mi, 15. april 2003-meersuni § 10, imm. 2. Suliffeqarfik ... tassaammatt sulineramik misiliinermut suliffissanik pissarsiniartartoq, suliamik suliarinnittoq naliliisimavoq qinnuteqartup suliffissarsiorlutut naqissusertinneqarnissaa eqqarsaatigalugu Suliffeqarfiup ...-p malittarisassai tassaasut atuuttut. Tamatuma saniatigut qinnuteqartup suliffissarsiorlutut naqissusertinneqarnera qinnuteqartup sulerusussuseqarnermik takutitsineratut isigineqartarpoq. Taamaattumik suliffissarsiuussisarfirmut attaveqarneq sulineramik misiliinermut piginnaangorsaaqqissinnaanermulluunniit atatillugu pissusissamisoortutut ilaavoq, siusinaartumik soraarnerussutisiaqalerumalluni qinnuteqartup sulineramik misiliisinneqarnissaanik piumasaqaatip eqqortinneqarneranut ilaasutut.

Siusinaartumik soraarnerussutisiaqalerumalluni qinnuteqarnermi periaaseq nalinginnaasoq unaavoq qinnuteqaatip siunnersuinermit imaluunniit kiffartuussinermit immikkoortortaqarfimmi suliamik suliarinnittumit tiguneqartarnera nakorsallu oqaaseqaataanik pissarsiniartarnera, qinnuteqaatip suliamik suliarinnittumut siusinaartumik soraarnerussutisianut tunngasunik isumaginnittumut ingerlaqqinnginnerani.

Siusinaartumik soraarnerussutisiaqalerumallutik qinnuteqartunik tassunga taarsiullugu piginnaangorsaqqinneqarnissamat kommunip innersuussissaneramik erseqqissumik naliliisoqannginnerani tamanna annikitsuinnarmik pisartooq oqaatigineqarsinnaavoq.

Qinnuteqartup siusinaartumik soraarnerussutisiaqalersinneqarsinnaannginnera, qinnuteqaatillugu kukkusumik nassiunneqarsimasutut assersuutigalugu piginnaangorsaaqqinnermut innersuunneqartarnerannik ajornartorsiut sulianik suliarinnittup ulluinnarni naapittagarinnigilaa. Taamaattumik siusinaartumik soraarnerussutisiaqalerumalluni qinnuteqaatit tamarmik siusinaartumik soraarnerussutisiat pillugit malittarisassat tunngavigalugit suliarineqartarput. Tamanna itigartitsinermik kingu-

neqarsinnaavoq, tassanilu qinnuteqartup itigartitsineq pillugu naammagittaalliuteqarnissaa periarfissaavoq. Siusinaartumik soraarnerussutisiaqalerumalluni qinnuteqaatip suliarineqarneranut atatillugu aalajangersimasumik ileqquuvoq qinnuteqaatip suliarineqarneranut peqatigitillugu qinnuteqartup piginnaanngorsaaqinniarneqartarnera. Siusinaartumik soraarnerussutisiaqalerumalluni qinnuteqartup piginnaanngorsaaqinneqarnera iluatsippat pineqartorlu sulilersinneqarpat qinnuteqartoq qinnutigisaminik itigartinneqartarpoq." (Atorfeqarfimmi nutsigaavoq)

Inaarutaasumik oqaaseqaatikka:

"K Kommuniq oqaatigisaasa paasinninninnik allanngortitsinissannut pissutissaqalersinngilaannga.

Uannut aamma paasiuminaappoq Suliffeqarfiup ...-p sulinermik misilinnermut suliffissanik pissarsiniartartuunera aamma siusinaartumik soraarnerussutisiaqalerumalluni qinnuteqartup suliffissarsiuussisarfimmi naqissusertinneqartartussaanera sukku imminnut ataqatigiinneqarnerisut.

Sulinermik misililineq (piginnaanngorsaaqqinneq) suliamik soraarnerussutisianut tunngasumik kommunip misissuineranut ilaatillugu aallartinneqarpat tamanna pineqartup suliffissarsiortuuneranik takussutissatut isigineqarsinnaanngilaq, taamaattumillu pineqartup suliffissarsiortutut nalunaarsortinnissamut pisussaaffeqarnera piginnaanngorsaaqqinnissaq eqqarsaatigalugu pingaaruteqanngilaq."

11. Qinnuteqaatip tunniunneqarnerani suliap ingerlasarnera.

Kommunimut 12. august 2004-mi imatut allappunga:

"Malugaara ”immersugassaq aappaluttoq” (immersugassaq pingaarneq) aamma ”immersugassaq tungujortoq” (qinnuteqaateqarnermi immersugassaq) kommunip atortarai.

Kommuni qinnuigaara pisuni sorlarni ”immersugassap aappaluttup” pisunilu sorlarni ”immersugassap tungujortup” atorneqartarnera nalunaarutigeqqullugu, aamma immersugassat tamarmik ataatsikkut atorneqartarnerisut, kiisalu immersugassat taakku arlaata toqqarneqarnera suliamik suliarinninnermut qanoq sunniuteqartarnerisq nalunaarutigeqqullugu."

Kommuni allakkatigut 10. december 2004-meersutigut imatut akivoq:

"Immersugassaq aappaluttoq, immersugassatut pingaarnertut aamma taaneqartartoq, tunngaviusutut paasissutissanik, soorlu ateq, najugaqarfik, aappariinnermut tunngasut aningaasaqarnermullu tunngasut pillugit paasissutissanik, imaqarpoq. Qinnuteqarnermi immersugassaq pineqanngilaq, tassaaginnarlunili immersugassaq, qinnuteqartoq pillugu tunngaviusumik paasissutissanik pissarsiniarnermi atorneqartussaq.

Immersugassaq tungujortoq, qinnuteqarnermi immersugassatut aamma taaneqartartoq tassaavoq qinnuteqarnermi immersugassaq, siusinnaartumik soraarnerussutisiat pillugit suliani isumaginninnermik ingerlatsiviup nalinginnaasumik atortagaa. Taassuma imarai ulloq qinnuteqarfiusoq, qinnuteqaammut tunuliaqutaasoq, ilinniaqarneq kiisalu pissutsit inummut pineqartumut tunngasut siusinnaartumik soraar-

nerussutisiaqalerumalluni qinnuteqaatip suliarineqarneranut pingaaruteqartut pillugit paasissutissat.

Taamaattorli oqaatigineqassaaq qinnuteqartoq paasissutissanik suliamut tunngasuteqartunik saqqummiussippat taakku qanoq iluseqarnerat apeqquataatinneqanngitsoq. Taamaalilluni qinnuteqarnermut atatillugu immersugassap aappaluttup tungujortullu immersorneqarnissaat isumaginninnermik ingerlatsiviup piumasaaqatigineq ajorpaa.

Immersugassalli pineqartut atorneqarnerat isumaginninnermik ingerlatsiviup pitsaaqutitut isigaa, tassami immersugassat qalipaataat suliamik paasiuminarnerulersitseqataasarmata, taamatuttaarlu suliami paasissutissanik pissarsiniarnermi toqqamavittut atorneqartarlutik.

Ilanngullugu oqaatigineqarsinnaavoq immersugassat immersorneqarnerat aammattaaq qinnuteqartup atuarsinnaanerani allassinnaaneranillu suliamik suliarinnittup paasisaqarnissaanut periarfissaliisarmat, tamannalu isumaginninnermik ingerlatsiviup piginnaanngorsaaqqinnissamut periarfissanut atatillugu paasissutissatut pingaartutut isigaa.

Kiisalu ilanngullugu oqaatigineqassaaq qinnuteqarnermi immersugassaq tungujortoq ilaanngippat, suliamilu allagaatini allani allattukkaniluunniit siusinaartumik qinnuteqartoqarsimasoq takuneqarsinnaappat piffissaq qinnuteqarfusoq sapinngisamik siusinnerpaamiittoq siusinaartumik soraarnerussutisiaqalerumalluni qinnuteqaatip aalajangiivigineqarnerani tunngaviutinneqartassasoq. Assersuutigalugu suliamit takuneqarsinnaappat siusinaartumik soraarnerussutisiaqalerumalluni qinnuteqarnissaq siunertaralugu nakorsap oqaaseqaataa assigisaaluunniit pissarsiariniarneqarsimappat." (Atorfeqarfimmi nutsigaavoq)

Oqaaseqaatigigallakkakka:

"Aallaqqaasiutitut oqaatigaara kommuni imatut oqarmat isumaqatigigiga, tassalu siusinaartumik soraarnerussutisiaqalerumalluni qinnuteqaatip qinnuteqarnermi immersugassaq aalajangersimasoq atorlugu allanneqarnissaa piumasaaqatigineqarsinnaanngitsoq.

Immersugassat taakku paasissutissanik pissarsiniarnermi toqqammavittut atorneqartarnerannik kommunip oqaatigisaa eqqarsaatigalugu oqaatigaara suliat amerlanersaanni ateq, najugaqarfik, suliffik/inuussutissarsiut kiisalu atsiorneq kisimik immersorneqartarsimasut.

Kommunip oqaatigisaa una "immersugassat immersorneqarnerat aammattaaq qinnuteqartup atuarsinnaanerani allassinnaaneranillu suliamik suliarinnittup paasisaqarnissaanut periarfissaliisarmat" eqqarsaatigalugu oqaatigaara pissusissamisoornerussagaluortoq assersuutigalugu qinnuteqartup atuarsimanagera/ilinniagaqarsimanagera assigisaallu pillugit paasissutissat pissarsiariniarneqarpata, qinnuteqartup immersugassamik immersuinaera aallaavigalugu qinnuteqartup pisinnaasaanik naliliinermut taarsiullugu. Aammattaaq oqaatigaara qinnuteqartut ataasiakkaat immersugassamik namminneq immersuisuusimanagerat qulakkeerneqarsinnaanngitsoq, taamatuttaarlu paasissutissat - qinnuteqartup pisinnaasaanik naliliinermut atatillugu - atorsinnaassuseqarnerat pineqartup taamaallaat atermik najugaqarfimmillu paasissutisiissussaanera eqqarsaatigalugu kilililerujussuussalluni. Tassani aamma ilaavoq immersugassat qinnuteqartup

atuarsinnaaneranut allassinnaaneranullu uppersartaatit kommunip kingusinnerusukkut atussappagit qinnuteqartup suliame illua tungiusutut isumaanik tamanna pillugu tusarniaavigineqartussaamera."

12. Akuersinermik uppersaanerit immikkut.

Kommunimut 12. august 2004-mi imatut allappunga:

"Maluginiarpara suliame arlalinni kommunip ingerlatsinermi oqartussaasumut allamut paasissutissanik pissarsiniarsinnaamera uppersartillugu kommunip qinnuteqaateqartumut atsiortittaraa, paasissutissat taakku kommunimi suliame suliarrinninnermut sumut atorineqarnissaat oqaatiginagu, tak. suliassat suliarineqartarnerat pillugu inatsimmi § 28, imm. 2, nr.1.

Kommuni qinnuigaara paasissutissat suut pissarsiarineqarnissaannut akuersinermut uppersaammmik pissarsiniartoqartarneraq nalunaarutigeqqullugu. Kommunimut malugeqqullugu oqaatigaara kommunip inatsisinik unioqqutitsinani innuttaasooq ataatsimut akuersissummik piumasaaqarfigisinnaangikkaa, taamatuttaarlu akuersissut taamaattoq naammannaviarunangitsoq."

Kommuni allakkatigut 10. december 2004-meersutigut imatut akivoq:

"Isumaginninnermik ingerlatsiviup siusinaartumik soraarnerussutisiaqalerumaluni qinnuteqaatinut atatillugu nakorsamit paasissutissanik kiisalu inuit suliame atatillugu attaveqarfigineqartartut attaveqarfigineqarnissaannut akuersissummik pissarsiniarajuttarpaa.

Taamaattoarli isumaginninnermik ingerlatsiviup nassuerutigaa soorunalimilu ajuusaarutigissallugu pisut ilaanni paasissutissanik pissarsiniartoqartarsimmmat qinnuteqartup ataatsimut akuersissutaa tunngavigalugu. Tamanna isumaginninnermik ingerlatsiviup paasinninnera malillugu periaasiuvoq eqqortuunngitsoq, tassami akuersilluni uppersaammi takuneqarsinnaasariaqarmat paasissutissat suut kimillu kiisalu sumut atugassatut pissarsiarneqarnissaat kissaatigineqartoq.

Akuersinermut uppersaait pillugit tunaartarisassat erseqqissut piaarnerpaamik suliarineqarniarput, matumani qarasaasiakkut immersugassat assigiissaartunik oqaasertalersukkat ilanngullugit eqqarsaatigalugit, taamatuttaarlu suliassaaqarfik taanna suliame suliarrinnittunut erseqqissaatigineqarniarluni." (Atorfeqarfimmi nutsigaavoq)

Oqaaseqaatigigallakkakka:

"Pisortat ingerlatsineranni suliassat suliarineqartarnerat pillugu Inatsisartut inatsisaanni § 30-ikkut makku aalajangersarneqarput:

"§ 30. Suliassani qinnuteqarnikkut suliassanngortinneqartuni pissutsit qinnuteqartup kisimi susassarisaq ilisimatitsissutigeqqusaassanngillat ingerlatsiviup ilaanit allanit imaluunniit ingerlatsinermut oqartussaasunit allanit.

Imm. 2. Imm. 1-imi aalajangersagaq atortuussanngilaq,

1) qinnuteqartoq tamatumunnga akuersippat,

2) ..."

Taamaalilluni suliani qinnuteqarnermut tunngasuni pissutsit qinnuteqartunut namminermt tunngalluinnartut pillugit paasissutissat pissarsiariniarneqarsinnaapput, qinnuteqartoq taamaaliornissamut akuersisimappat.

Akuersissut eqqoqqissaartunik oqaasertalersorneqassaq, pisariaqartinneqartullu sinnernagit annertussuseqartinneqassalluni. Taamaalilluni ataatsimut akuersisuttip paasissutissanik sunilluunniit isumaginninnermik ingerlatsiviup pissarsiniarsinnaaneranut aqutissiuussisup anguniagaq taanna eqqortinnaviangilaa.

Aammattaaq ingerlatsinermi oqartussaasup qinnuteqartoq ilitsersortariaqarpaa qinnuteqartoq akuersiumanngippat tamanna aalajangiinnermut sunnuteqarsinnaassasoq."

13. Suliami illua'tungiusup isumaanik tusarniaasarneq.

Kommunimut 12. august 2004-mi imatut allappunnga:

"Suliassat suliarineqartarnerat pillugu inatsimmi § 19 suliami illua'tungiusup isumaanik tusarniaasarneq pillugu malittarisassamik imaqarpoq. Kommuni qinuigaara kommuni siusinaartumik soraarnerussutisiaqalersitsinissamik imaluunniit itigartitsinissamik aalajangiisoqartinnagu suliami illua'tungiusup isumaanik qanoq annertutigisumik tusarniaasarnersoq nalunaarutigeqqullugu."

Kommuni allakkatigut 10. december 2004-meersutigut imatut akivoq:

"Suliassat suliarineqartarnerat pillugu inatsimmi § 19 tunngavigalugu suliami aalajangiisoqarsinnaanngilaq, suliami pissusiviusut pillugit paasissutissat akornuusiinnaasut suliap aalajangiivigineqarnissaanut pingaaruteqartut suliami illua'tungiusumut ilisimatitsissutigineqareersimatinnagit.

Isumaginninnermik ingerlatsiviup periaaseraa siusinaartumik soraarnerussutisiat pillugit aalajangiisoqannginnerani qinnuteqartup suliamik suliarinnittumit oqaloqatigineqarnissaanut aggeqqusisarneq. Oqaloqatiginnermi tassani suliap ataatsimoorluni oqaluuserineqartarpoq, qinnuteqartorlu ingerlatsiviup inassuteqaataanik kiisalu tamatumunnga tunngaviusumik ilisimatinneqartarluni.

Ingerlatsiviup inassuteqaataa qinnuteqartup isumaqatiginnippagu tamanna inassuteqaallu suliami allattuiiffimmi allattukkani takuneqarsinnaassaaq. Tamatuma kingornatigut isumaginninnermik ingerlatsiviup naliliinera unaavoq qinnuteqartut siusinaartumik soraarnerussutisiat pillugit aalajangiinissaq sioqqullugu tusarniaavigineqartartut." (Atorfeqarfimmi nutsigaavoq)

Oqaaseqaatigigallakkakka:

"Pisortat ingerlatsineranni suliassat suliarineqartarnerat pillugu Inatsisartut inatsisaanni nr. 8-mi, 13. juni 1994-imeersumi § 19 suliami illua'tungiusup isumaanik tusarniaasarneq pillugu malittarisassamik imaattunik imaqarpoq:

"§ 19. Suliassami (illuatungiulluni) peqataasoq paasissutissanik aalajangersimasunik suliassami pisimasuinnut tunngasunik oqartussaasut pigisaqarnerannik ilisimasaqarsorinangippat aalajangiisoqassanngilaq peqataasoq taanna paasissutissanik tamakkuninnga oqartussaasunit ilisimatinneqartinnagu oqaaseqaateqarnisaanullu periarfissinneqartinnagu. Aalajangigarli taanna aatsaat atortuussaaq paasissutissat peqataasumut tassunga iluaqutaasussaassanngippata suliallu aalajangiiffiginissaanut annertuumik pingaaruteqarpata. Oqartussaasut oqaaseqaateqarnissamut taaneqartumut piffissamik killiliisinnaapput.

Imm. 2. Imm. 1-imi aalajangersagaq atortuussanngilaq

1) paasissutissat pissuserisaat suliassallu suussusia naapertorlugit tigummia-riikkat tunngavigalugit suliami aalajangiinissaq nangaanartutut isumaqarfiginanngippat,

2) kinguartitsineq kinguneqassappat suliassap aalajangiiffiginissaanut inatsisitigut killiliussap qaangerneqarneranik,

3) peqataasup taassuma suliassap aalajangiiffigineqarnissaata kinguartinneqarnissaanik soqutiginninnera pisortat inuinnaalluunniit soqutigisaat taamatut kinguartsitsinikkut ajoquserneqartussat pissutiginerullugit minneruttittariaqartutut isumaqarfiginarpat.

4) kapitali 4-mi maleruagassiat malillugit peqataasoq taanna paasissutissanik suliassamut tunngasunik tamakkuninnga ilisimatinneqarnissamut pisussaannngippat,

5) paasissutissanik peqataasumut saqqummiussineq annertuumik ajornartorsiu-tissartaqassaaq, matumani aalajangernerme inuppasuit peqataasutut inissisimasut ilaatinneqartussaanagerat pissutigalugu, imaluunniit

6) inatsisitigut immikkut ittunik aalajangersagaqarpat peqataasup aalajangiineq pitinnagu aalajangiinissamut eqqarsaatigineqartumut tunngaviusunik ilisimatinneqarnissaanut pisussaalersitsisunik.

Imm. 3. Naalakkersuisut maleruagassaliorsinnaapput suliassaqarfut erseqqinnerusumik taaneqartut, imm. 2, nr. 2-mi imaluunniit 5-imi aalajangersakkat nalinginnaasumik atortuuffigisassaasat, imm. 1-imi aalajangersakkami pineqartunut ilaatinneqartussaannnginnerannik."

§ 19, imm. 1 malillugu pingaarnertut malittarisassaq unaavoq ingerlatsinermi oqartussaasut suliami illua tungiusup isumaanik tusarniaanissaq pisussaaffigigaat, suliami pissusiviusut pillugit paasissutissanik illua tungiusumut akornusiisinnaasunik suliallu aalajangiivigineqarneranut pingaaruteqartunik aalajangersimasunik oqartussaasoq peqartoq suliami illua tungiusup ilisimasaqarnissaa naatsorsuutigineqanngippat.

Paasissutissat suliami ilaatinneqarnerannik suliami illua tungiusup ilisimasaqannginnissaannik naatsorsuutiginninnermik siullertut piumasaqaataasoq aamma eqqortinneqarsimassaaq, paasissutissat taakku suliami illua tungiusup ilisimagaluarpagilluunniit, ataqatigiinneqarnerminili pineqartumi atorneqarniarnerat ilisimannngippagu. Tamatuma pissuseqataa atuuppoq assersuutigalugu paasissutissat napparsimmavimmit pissarsiarineqartut eqqarsaatigalugit, oqartussaasoq paasissutissanik pissarsiarineq sioqqullugu akuersisummik pissarsisimagaluarpalluunniit.

Paasissutissat suliami illua tungiusumut saqqummiunneqartussat saqqummiunneqassapput paasissutissat imarisaat, pissusii pissarsiarineqarfiallu takuneqarsinnaalersillugit. Paasissutissanik allaaserinninnermi pis-

sutsit pingaaruteqartut alluinnarneqassanngillat, eqqoqqissaanngitsuussanani, marloqiusamik paasineqarsinnaasuussanani imaluunniit eqqunngitsuussanani.

§ 19, imm. 1 malillugu suliami illua tungiusup isumaanik tusarniaanerup siunertaa tassaavoq suliami illua tungiusup suliami pissusiviusutut tunngavigineqartut pillugit oqaaseqaateqarnissaminut, naqqiissuteqarnissaminut ilassuteqarnissaminullu periarfissinneqarnissaa.

Suliami illua tungiusup suliap qanoq inernilerneqartariaqarnera pillugu isummaminik saqqummiussinissamut periarfissaqartinneqarsimanera suliami illua tungiusup isummaminik tusarniaavigineqarsinnaatitaanerata eqqortinnissaanut tamatigut naammattuaannartanngilaq.

§ 19 tusarniaanerup qanoq iluseqartinneqarnissaanut piumasaaqatinik imaqanngilaq. Taamaalilluni suliami illua tungiusup isumaanik tusarniaaneq allakkatigoortuusinnaavoq oqaasiinnartigoortuusinnaalluniluunniit. Taamatuttaaq tamanna ataatsimiinnermi ingerlanneqarsinnaavoq. Tusarniaanerup ilusiliunneqartup taamaallaat suliami illua tungiusup isumaanik tusarniaasusaatitaanerup siunertaa ataqqissavaa, tassalu suliami illua tungiusoq periarfississavaa suliami pissusiviusutut tunngaviutinneqartut pillugit oqaaseqaateqarnissaanut, naqqiissuteqarnissaanut ilassuteqarnissaanullu.

Suliami illua tungiusup isumaanik tusarniaaneq oqartussaasup suliami aalajangiinissamut piareernerani pigajuttartussaavoq. Pisut amerlanersaanni suliami illua tungiusup isumaanik tusarniaanermi siunertaasoq taamaallaat anguneqarsinnaassaaq saqqummiussineq allakkatigut pippat, suliamilu illua tungiusoq akissuteqarnissaminut piffissalernerqarpat. Piffissaliunneqartup qanoq sivisutiginissaa paasissutissat pineqartut qanoq paasiumiaatsiginerat qanorlu annertutiginerat tunngavigalugu, aalajangiinerullu qanoq nanertuutaatiginissaa apeqputaatillugu, suliamilu illua tungiusup suliami sinniisup akuliutsinneqarnissaanik pisariaqartitsinera apeqputaatillugu sivisussusilerneqassaaq.

Taamaattumik uanga paasinneqqaarnera unaavoq siusinaartumik so-raarnerussutisianik itigartitsinerit pillugit suliat amerlanerpaartaanni suliami illua tungiusup isumaanik tusarniaanerup allakkatigoortinneqarnissaa pisariaqartuussasoq, tassami qinnuteqartoq kommunip aalajangiinnermi tunngavigisaa pillugu isummernissaminut piffissaqarnissamik pisariaqartitsisinnaammat, kiisalu tamatuma inummut pisut avataanniittumut oqaloqatiginnissutiginissaa pisariaqartissinnaallugu.

Suliami illua tungiusup isumaanik tusarniaanerup qinnuteqartumik ataatsimeeqatiginninnermi ingerlanneqarnissaa ingerlatsiviup toqqarpagu ingerlatsiviup qinnuteqartoq makkuninnga paasissutississallugu pissusaaffeqartussaavoq, tassalu suliami illua tungiusup isumaanik tusarniaaneq pineqartoq, taamatuttaarlu ingerlatsiviup pissusaaffigisussaassallugu paasissutissat taakkuusut suliami illua tungiusup isumaanik tusarniaaneq allakkatigut ingerlanneqarsimasuuppatt saqqummiunneqartussat

assingi saqqummiutissallugit. Suliami illua tungiusup paasissutissat pillugit imaaliallaannaq isummerfiginnissinnaanera kommunip qulakkiissavaa, taamaaliornikkut suliami illua tungiusup oqaaseqaatinik saqqummiussinissaminut piffissalernerqarnissani pisariaqartissanngimmagu.

Aammattaaq oqaatigaara suliami illua tungiusup isumaanik tusarniaaneq innuttaasumik ataatsimeeqateqarnermi ingerlanneqarsinnaappat ingerlatsivik pisussaaffeqarmat tusarniaaneq pillugu allakkiornissaminut, suliamilu illua tungiusup isumaanik oqaasiinnartigut tusarniaanerup § 19-imi piumasaqaataasunik eqqortitsisuunerata uppersaasorsornissaa kommunip tamatigorluinnaq pisussaaffigigaa.

Uanga paasinninnera aamma unaavoq kommunip suliassat suliarineqartarnerat pillugu inatsimmi § 21 suliami illua tungiusumut ilisimatissutigisariaqaraa, tassanimi aalajangersarneqarmat suliap aalajan-giiffigineqarnissaata suliami illua tungiusup oqaaseqaateqareernissaata tungaanut kinguartinneqarnissaa suliami illua tungiusup suliap suliarineqarnerani sukkulluunniit piumasarisinnaagaa, § 21, imm. 2-mi atuutsitsinnginnissamut periarfissat ilaata atornerqarnissaa aalajangiunneqarsimanngippat.

Aamma oqaatigaara qinnuteqartumut ingerlaavartumik attaveqarfiginnittarneq suliassat suliarineqartarnerat pillugu inatsimmi aalajangersarneqartut malillugit suliami illua tungiusup isumaanik tusarniaanertut isigineqarsinnaanngitsoq."

14. Sulianik allatigut paasissutissartalersuineq.

Kommunimut 12. august 2004-mi imatut allappunga:

"Kommuni suliarpaalunni suliamik suliarinninnermi atugassatut paasissutissanik ilaatigut suliffissarsiuussisarfimmit aamma peqqinnissaqarfimmit pissarsiniartarsimavoq. Kommuni qinnuigaara paasissutissat taakku suliani atornerqannginneranni kommuni taakku pillugit naliliisarnersoq imaluunniit paasissutissat misissoqqaarnagit tunngaviutiinnarneqartarnersut nalunaarutigeqqullugu."

Kommuni allakkatigut 10. december 2004-meersutigut imatut akivoq:

"Suliani siusinaartumik soraarnerussutisianut tunngasuni tamani paasissutissat inassuteqaateqarnissaq aalajangiinissarlu sioqqullugit aallaavittut oqimaalutarneqartarput. Nakorsap paasissutissiissutai eqqarsaatigalugit taakku tusaatissat tigu-neqartarput, suliamilli suliarinnittumit misissoqqaarnagit tunngaviutinneqartarnatik, tassami nakorsap paasissutissiissutai suliami paasissutissanut allanut sanillinneqartussaammata, matumani isertitat pillugit paasissutissaasinnaasunut naapertuunner-sut ilanngulugu eqqarsaatigalugu.

Aamma oqaatigineqarsinnaavoq siusinaartumik soraarnerussutisiat pillugit inassuteqaatit tamarmik TFU-revamut (piginnaanngorsaaqqinnermi oqartussaasut asigiinngitsut suleqatigiiffiatut ataatsimiititaliamut) tusarniaatigalugit nassinneqartarmata, isumaginninnermi ataatsimiititaliamut inaarutaasumik inassuteqaateqannginnermi. TFU-revami ilaatigut ilaasortaapput nakorsaq, suliffissarsiuussisarfimmi

siunnersorti, isumaginninnermi siunnersorti, isumaginninnermut immikkoortortaqruiup pisortaa kiisalu siusinaartumik soraarnerussutisianut tunngasuni sulianik suliarinnittoq. Taamaalilluni ataatsimiititaliaq taanna suliami paasissutissanik tamanik naliliisinnaassuseqartuuvoq." (Atorfeqarfimmi nutsigaavoq)

Oqaaseqaatigigallakkakka:

"Oqaatigaara paasissutissat sukumiisumik naliliiffigisinnaajumallugit ingerlatsiviup paasissutissat suliami illua tungiusup isummaminik tusarniaavigeqarnerminut atatillugu saqqummiussai ilannguttariaqarai, suliami illua tungiusup isumaanik tusarniaaneq inassuteqaatip suliarineqarnera sioqqullugu ingerlanneqarsimappat."

15. Imigassartorunnaarsitsiniarluni katsorsaaneq.

Kommunimut 12. august 2004-mi imatut allappunga:

"Sulianit arlalinnit ersepoq sulineramik misiliinissaq sioqqullugu imigassartorunnaarsitsiniarluni katsorsaaniissaq isumaginninnermik ingerlatsiviup piumasaqaatigisarsimagaa. Suliani taakkunani sulianit arlalinnit erseqqissumik ersepoq AA-mi ataatsimiinnerni peqataasarnissaq kommunip immikkut piumasaqaatigisarsimagaa, suliami ataatsimi qinnuteqartup ataatsimiinnerni taakkunani peqataajumanginnini oqaatigisimagaa, ataatsimiinnernimi taakkunani ajornartorsiutini inuit ataatsimoorut akornanni saqqummiuttartussaagamigit.

Kommuni qinnuigaara tamanna pillugu oqaaseqaateqaqqullugu, tamatumunngalu atatillugu isumaliutersuutigalugu qinnuteqartup inuit ataatsimoorut katsorsarnerqarneranni taamaattumi peqataaqqullugu peqquneqarnera nammineq inuttut inuunera ataqqineqarnissaanik piumasaqaateqarsinnaatitaaneranut assortuuttuusinnaanersoq. Aammattaaq kommuni qinnuigaara qinnuteqartup imigassartorunnaarsitsiniarluni katsorsaanerut peqataarusunnginnera qinnuteqaatip suliarineqarneranut sunniuteqartarnersoq nalunaarutigeqqullugu.

Aammattaaq kommuni qinnuigaara qinnuteqaateqartup AA-mi ataatsimiinnerni peqataasarnissaanik piumasaqaateqarnermut inatsisitigut tunngavigeqartoq pillugu nassuaateqaqqullugu."

Kommuni allakkatigut 10. december 2004-meersutigut imatut akivoq:

"Siusinaartumik soraarnerussutisiaqalerumalluni qinnuteqartup sulineramik misiliisneqarnissaa sioqqullugu isumaginninnermi ingerlatsiviup ingerlatsinnermi periaatsit aalajangersimasutut piumasaqaatigisarpaa qinnuteqartoq imigassamik atonerluisuuppaat taassuminnga qaangiiniarnissamut ikiorneqassasoq, tassami atonerluineq qaangerneqarsimangippat sulineramik misiliisitsineq pisorpassuarni asuliinnartussaammat.

Taamaattorli imigassartorunnaarsitsiniarnerup qanoq iluseqarnissaa isumaginninnermik ingerlatsiviup piumasaqaatigineq ajorpaa. Taamaattumik qinnuteqartut namminneq AA imaluunniit Qaqiffik (Kalaallit Nunaanni neqeroorutituaasut) aqputigalugit imigassartorunnaarniarumanerlutik, imaluunniit atonerluisuusimagunin atonerluinertik qaangerniarlugu namminneq suliniuteqarniarnerlutik namminneq toqqarsinnaavaat.

Taamaattorli siusinaartumik soraanerussutisiaqalerumallutik qinnuteqartut imigassamik atornerluisuusut Qaqiffikkoortumik AA-p ilaaffigisaanik katsorsarneqarnissamik malittarisassatut pingaarnertut neqeroorfigineqartarput. Tamannali ingerlatsiviup tungaanit taamaallaat neqeroorutitut, imaanngitsoq piumasaqaatitut, isigineqassaaq. Taamaattumik qinnuteqartut allaasumik paasinnittarsimappata tamanna soorunalimi ajuusaarutigineqassaaq.

Siusinaartumik soraanerussutisiaqalerumalluni qinnuteqartoq imigassamik atornerluisuusooq katsorsarneqarumangippat erseqqissumik naliliisoqassaaq sulinermik misiliisitsoqaaannassanersoq, imaluunniit taamaaliornissaaq siunertaqanngitsutut isigisariaqarnersoq.

Suliali ataasiakkaanut tunngasorujussuummata, suliallu ataatsimut naliliivigineqarneranik tunngaveqartarmata qinnuteqartup imigassartorunnaarsitsiniarluni katsorsaarnermut peqataajumanginnerani ataatsimut tunaartarisassaliornissaaq ajornartussaavoq." (Atofeqarfimmi nutsigaavoq)

Oqaaseqaatigigallakkakka:

"Kommunip paasisutissiissutigisai imatut paasivakka qinnuteqartoq atornerluisuusimappat qinnuteqartup sulinermik misiliisinneqannginnerani qinnuteqartoq atornerluineranik qaangiisinniarlugu ikiorsiisoqarnissaa kommunip piumasaqaatigisaraa, katsorsaanerulli qanoq ilusilerneqarnissaa kommunip piumasaqaatigineq ajoraa.

Oqaatigaara pisortanit pensionisiat pillugit Inatsisartut peqqussutaanni § 10, imm. 2-kkut aalajangersarneqarmat siusinnaartumik soraanerussutisiaqalersitsisoqannginnerani piginnaanngorsaaqqinnermut ikiorsiisarneq pillugu Inatsisartut peqqussutaat tunngavigalugu piginnaanngorsaaqqinneq misilinneqarsimassasoq.

Sulinermik misiliinerup aallartinnginnerani qinnuteqartup atornerluisuusimaguni atornerluinini pillugu katsorsartinnissaa ingerlatsiviup piumasaqaatigisinnaagaa piginnaanngorsaaqqinnermut ikiorsiisarneq pillugu Inatsisartut peqqussutaanni takuneqarsinnaanngilaq.

Taamaalilluni sulinermik misiliineq aallartinniarlugu atornerluineq pillugu katsorsaasoqarnissaanik ingerlatsiviup piumasaqaateqarsinnaaneranut inatsisikkut tunngavissaqanngilaq.

Apeqqutaalerpoq taamaakkaluartoq ingerlatsivik sulinermik misiliinerup aallartinnginnerani katsorsaasoqarnissaanik piumasaqaateqarsinnaanersoq.

Aalajangiinnermut atasumik piumasaqaateqartoqarsinnaassappat piumasaqaatigineqartup inatsisunik eqqortitsisuuneranik naliliinermi aallavik unaasariaqarpoq piumasaqaat taanna aalajangiinnermut piumasaqaammik ilaqartinneqartumut pissusissamisoortumik ataneqarnersoq.

Qinnuteqartoq imigassamik atornerluisuuppat sulinermik misiliinerup pisut ilarpassuini asuliinnartussaanageranik kommunip tunngavilersuutaa paasisinnaavara. Ungali paasinneqqaarnera malillugu imaappoq sulinermik misiliineq aallartinneqassappat qinnuteqartup atornerluinerminik qaangiisimanissaanik ingerlatsiviup piumasaqaateqarsinnaanera qularnartoq. Tamatuma qanoq akineqarnissaani ilaatigut atornerluinerup

qanoq iliorluni paasineqarsimanagera katsorsarneqarnissamillu pisariaqartitsineq nakorsanit uppersarneqarsimanagera apequtaasussaapput.

Oqaatigineqartut aamma imatut paasivakka katsorsaanerup qanoq iluseqartinneqarnissaa kommunip piumasaqaatigineq ajoraa. Tamanna pillugu oqaatigaara kommuni pisumi pineqartumi naliliippat atornerluineq pillugu katsorsaaneq piumasaqaatigineqarsinnaasoq, uanga paasinneqqaarnera unaasoq atornerluinermik katsorsaanerup ilumut ingerlanneqarnera/ingerlanneqarsimanagera kommunip uppersartissinnaasariaqaraa.

Paasissutissiissutigineqartut tusaatissatut aamma tiguakka."

16. Soraarnerussutiaqalernissamik qinnuteqaatit pisoqaaneruset.

Kommunimut 12. august 2004-mi imatut allappunga:

"Suliani arlaqartuni qinnuteqartoq siusinaartumik soraarnerussutisiaqalernissamik qinnuteqartarsimagaluarpoq, kommunili naliliisarsimalluni qinnuteqaat atorunnaartoq, innuttaasup piffissap sivilisunerup ingerlanerani qinnuteqaanni pillugu paasiniaasimanginnera pissutigalugu.

Kommuni qinnuigaara tamatumunnga inatsisitigut tunngavigineqartoq nalunaarutigequllugu."

Kommuni allakkani 10. december 2004-meersuni imatut akivoq:

"Suliat pineqartut pingasut eqqarsaatigalugit isumaginninnermik ingerlatsivik allassornikkut aqutsinermi aalajangiivoq qinnuteqaatit atorunaarsinneqassasut, qinnuteqartup isumaginninnermik ingerlatsivimmu piffissami sivilisoorujussuarimi saaffiginnissimanginnera pissutigalugu. Aalajangiinerit taakku sulianik suliarinnittut kukkusumik ilitsersorneqarsimanagerat tunngavigalugu pisimapput, tamannalu soorunalimi assut ajuusaarutigineqassalluni.

Suliat pineqartut pingasut tassaapput:

...

Suliat isumaginninnermi ingerlatsiviup eqqumaffigai, nassuerutigalugulu qinnuteqartup ilatsiinnarnera pissutigalugu qinnuteqaatinik atorunaarsitsisarnermik periaaseqarneq inatsisitigut tunngavissaqanngitsoq. Taamaattumik malittarisassat sulianik suliarinnittunut erseqqissarneqarsimapput.

Taamaattorli uiggiullugu oqaatigineqassaaq isumaginninnermik ingerlatsiviup paasinninnera unaasoq suliaq qinnuteqarnermut tunngasoq qinnuteqartup suliamik paasissutissartalersuinnermut peqataajumanginnera pissutigalugu nukingjunneqarsinnaanngippat peqataajumanginnerup amigartumilluunniit peqataanerup ingerlatsinermi qinnuteqartumut akornusiisumik sunniuteqartinnissaanut ingerlatsivik periarfissaqartoq, tak. Hans Gammeltoft-Hansenip allallu atuakkiaanni "Forvaltningsret"-imi, Jurist- og Økonomforbundip naqiterisarfianit 1994-imi saqqummersinneqartumi qupp. 317.

Isumaginninnermi ingerlatsiviup periaasia tunngavigalugu ingerlatsinermi akornusiisumik sunniuteqartitsisoqassappat piumasaqaataavoq qinnuteqartoq paasissutissanik amigaataasunik tunniuseqqullugu nukingisaarneqarsimassasoq, suliallu paasissutissartalersorneqarnerani peqataannginnerup inatsisitigut sunniutaanik immikkut paasitinneqarsimassasoq, suliarlu paasissutissat pigineqartut tunngavigalugit

aalajangiivigineqarniarloq, tamatumalu itigartitsinermik inernilerneqarnissaa ili-
manaateqartorujussuusoq." (Atorfeqarfimmi nutsigaavoq)

Oqaaseqaatigigallakkakka:

"Kommunip aallaqqaasiutitut oqaatigaa:

*"... isumaginninnermik ingerlatsivik allaffissornikkut aqutsinermi aalajangiivoq
qinnuteqaatit atorunaarsinneqassasut, qinnuteqartup isumaginninnermik ingerlat-
sivimmu piffissami sivisoorujussuarmi saaffiginnissimanninnera pissutigalugu.
Aalajangiinerit taakku sulianik suliarinnittut kukkusumik ilitsersorneqarsimanerat
tunnavigalugu pisimapput, tamannalu soorunalimi assut ajuusaarutigineqassal-
luni."*

*Qinnuteqartoq isumaginninnermik ingerlatsivimmu piffissami sivisoor-
ujussuarmi saaffiginnissimannikkaluarpalluunniit kommunip qinnute-
qaatinik atorunnaarsitsisinnaanninneranik kommunip paasinninnera ila-
lersinnaavara. Kommunip tamatumunnga ajuusaarutiginninnera ilalersin-
naavara. Tulliullugu oqaatigaara uanga paasinninnera unaasoq qinnute-
qaatit pineqartut suli atuuttuusut, utertinneqarsimannikkunik inaarlugil-
lunniit suliarineqarsimannikkunik".*

17. Utoqqalinersiaqalernermut ikaarsaariarneq.

Kommunimut 12. august 2004-mi imatut allappunga:

"Suliani arlalinni siusinaartumik soraarnerussutisiallit utoqqalinersiaqalernermut
ikaarsaariartarsimapput, siusinaartumik soraarnerussutisiaqalernissamik qinnute-
qaat piffissamit qinnuteqarfiusumit aalajangiivigineqarsimannikkaluortoq. Kom-
muni qinnuigaara tamatumunnga pissutaasoq pillugu kiisallu siusinaartumik so-
raarnerussutisiaqalernissamik qinnuteqaat pillugu suliap aalajangiivigineqanngin-
neranut inatsisitigut tunnavigineqartoq pillugu nassuiaateqaqqullugu."

Kommuni allakkatigut 10. december 2004-meersutigut imatut akivoq:

"Isumaginninnermik ingerlatsiviup periaasia malillugu qinnuteqaatini qinnute-
qartumit namminermi utertinneqarsimannigitsuni tamani aalajangiisoqartussaavoq.

Siusinaartumik soraarnerussutisiaqalerumalluni qinnuteqartoq suliami siusinaar-
tumik soraarnerussutisianut tunngasumi aalajangiisoqannginnerani utoqqaliner-
siaqalersinnaatitaanermi ukiussani anguppagit pineqartoq utoqqalinersiaqalersin-
neqassaaq, ulloq taakkuninnga pisinnaatitaalerfini aallarnerfigalugu. Utoqqaliner-
siuteqalernerulli suliami siusinaartumik soraarnerussutisianut tunngasumi aalaja-
ngiisoqannginnissaa nassatarinngilaa.

Taamaalilluni isumaginninnermi ingerlatsiviup suliami aalajangiisoqarnissaa
anguniartarpaa, qinnuteqartup utoqqalinersiuteqarnermut ikaarsaannginnerani."
(Atorfeqarfimmi nutsigaavoq)

Oqaaseqaatigigallakkakka:

"Pisut ilaanni imaassinnaavoq (piffissami utoqqalinersiutisiaqalersit-siviusup siornani) siusinaartumik soraanerussutisiaqalersitsisoqarnera aningaasaqarnermut sunniuteqarsinaaasoq. Taamaattumik siusinaartumik soraanerussutisiaqalerumalluni qinnuteqaatit pillugit suliat qinnuteqartup utoqqalinersiuteqalernissaa sioqullugu isummerfigineqarsimanningsut kommunimit suliareqqinneqartarnerat ilalersinnaavaara.

Kommunip oqaatigisai pillugit tamatuma saniatigut allanik oqaaseqaatissaqanngilanga."

18. Itigartitsissutinut malitseqartitsineq.

Kommunimut 12. august 2004-mi imatut allappunga:

"Suliarpaalunni siusinaartumik soraanerussutisiaqalernissamik qinnuteqaat kommunip inuussutissarsiorsinnaassuseqarneq innersuussutigalugu itigartitsissutigisarsimavaa.

Kommuni qinnuigaara piginnaangorsaaqqinneq pillugu Inatsisartut peqqusutaat kisiat tunngavigalugu piginnaangorsaaqqinnermik suliap aallartinnissaanut tunngavissaqarnerisq kommunip suliani taakkunani misissortarsimaneeraa nalunaarutigequllugu."

Kommuni allakkatigut 10. december 2004-meersutigut imatut akivoq:

"Isumaginninnermik ingerlatsiviup periaaseraa siusinaartumik soraanerussutisiaqalerumallutik qinnuteqartut siusinaartumik soraanerussutisiat pillugit aalajangiineq sioqullugu piginnaangorsaaqqinniarlugit misilinneqartarnerat aallaavittut ingerlattarlugu, tak. pensionisiat pillugit peqqussummi § 10. Taamaattumik piginnaangorsaaqqinnermik periarfissaq suliamik suliarinninnerup ilaatut aalajangersimasutut ilaasarpq.

..." (Atorfeqarfimmi nutsigaavoq)

Oqaaseqaatigallakkakka:

"Kommunip oqaatigisai imatut paasivakka tamanna pissutissaqartillugu qinnuteqartup piginnaangorsaaqqinnermut ikiorsiisarneq pillugu peqqussut tunngavigalugu piginnaangorsaaqqinneqarnissaa kommunip isumaginiaraa. Tamanna tusaatissatut tiguara.

Suliami annertunerusumik iliuuseqaqqissanngilanga."

Ilanngussaq 1

Piffissaq K Kommunip sulianik suliarinninnermut atortagaa, suliat siusinaartumik soraarnerussutisiat. K Kommunimi suliat siusinaartumik soraarnerussutisiant tunngasut katillugit 88-it misissorpakka. Suliat 64-imit 88-imit tassapput suliat kommunimi misissuininni oqaaseqaateqarfiginissaat pisariaqanngitsutut isigisakka. Taamaattumik suliat taakku pillugit paasisutissat nutaat pigingilakka, taakkulu piffissamik suliat suliarineqarnerinut atorineqartumik naatsorsuininni ilaatinneqannginnissaat toqqarsimallugu.

Skemami tulluuttumi taaneqarput siusinaartumik soraarnerussutisiaqalerumalluni qinnuteqaat kommunimut qanga tunniunneqarsimasoq kiisalu suliap inaarlugu suliarineqarfiata ullua.

Suliaq inaarlugu qanga suliarineqarsimasoq oqaatigineqarsimanngippat tamanna nalunaarneqartarpoq, ullorlu inassuteqaateqarfik oqaatigineqarsimappat taanna tunngavigalugu naatsorsuisoqartarluni. Qinnuteqaat aalajangiivigineqarsimanngitsoq suliame allagaatinit erserpat piffissaq suliame suliarinninnermut 130605-ip tungaanut atorineqartoq naatsorsorneqartarpoq.

Taamatutaaq suliat inaarlugit suliarineqarsimanngitsut eqqarsaatigalugit piffissaq suliame suliarinninnermut atorineqartoq 13. juni 2005 tunnga-vigalugu naatsorsorneqartarpoq.

Piffissamik suliat suliarineqarnerinut atorineqartumik naatsorsuininni naatsorsueriaaseq una atorpara:

Ukioq ataaseq = ullut 365

Qaammatit tulleriinneri malillugit ullut 31, 30 aamma 28

Assersuut: Suliaq 1: Ulloq qinnuteqarfik 211199, ulloq inaarsaaffik 211004, katillugit ukiut 4 qaammatillu 10 =

$1460 (4 \times 365) + 304 (3 \times 30 + 6 \times 31 + 28) =$ ullut 1764.

Suliaq 3 (inaarneqanngitsoq): Ulloq qinnuteqarfik 260302, 130605-imi inaarneqarsimanngitsoq, manna tikillugu ukiut 3, qaammatit 2 ullullu 13 = $1095 (3 \times 365) + 61 (31 + 30) +$ ullut 13 = ullut 1169.

Suliat inaarlugit suliarineqarsimasut eqqarsaatigalugit agguaqatigiissitsinermi piffissaq suliap suliarineqarneranut atorineqartoq ullunik 719-inik sivissuseqarpoq, uunga naapertuuttumik: Ukioq 1, qaammatit 11 ullullu 19.

Suliat inaarlugit suli suliarineqarsimanngitsut eqqarsaatigalugit agguaqatigiissitsinermi piffissaq suliap suliarineqarneranut atorineqartoq ullunik 914,7-inik sivissuseqarpoq, uunga naapertuuttumik: Ukiut 2, qaammatit 6 ullorlu 1.

Suliaq nr.	Ulloq Qinnuteqarfik	Ulloq inaar-saaffik	Piffissaq suliarinninnermut atorneqartoq/-oqaaseqaatit
1	211299	211004	Ukiut 4 qaammatillu 10
2	091202	240604	Ukioq 1, qaammatit 6 ullullu 15
3	260302	Inaarne-qanngilaq	Manna tikillugu ukiut 3, qaammatit 8 ullullu 3
4	Oqaatigineqanng.	Oqaatigine-qanngilaq	
5	070501	270504	Ukiut 3 ullu 20
6	131202	270504	Ukioq 1, qaammatit 5 ullullu 14
7	101001	Inaarne-neqanngilaq	Manna tikillugu ukiut 3, qaammatit 8 ull. 12
8	Nov. 01	180504	Sulinermik misiliineq 09104
9	010803		Ukiut 2 qaammatillu 6
			Manna tikillugu ukioq 1, qaamm. 10 ull. 12.
10	081003	Oqaatigine-neqanngilaq	Sulinermik misiliineq 091004
			Inassuteqarniss. tungaanut qaamm. 7 ull. 10
11	090101	140504	180504-mi aalajangiiffigsassanngortitaq
12	211203	181004	Ukiut 3, qaammatit 4 ullullu 5
13	281003	Inaarne-qanngilaq	Qaammatit 9 ullullu 27
			Manna tikillugu ukioq 1, qaamm. 7 ull. 16
14	290304	Inaarne-qanngilaq	Manna tikillugu ukioq 1, qaamm. 2 ull. 15
15	251001	280904	Ukiut 2, qaammatit 11 ullullu 3
16	080702	021204	021204 inaassangasaq, uk. 2, qaam. 4 ull. 24
17	180702		Ukioq 1, qaammatit 10 ullullu 18
			Suliaq 150604-mi tunuartinneqarpoq
18	170902	071004	Ukiut 2 ullullu 21
19	280102	Inaarne-qanngilaq	Manna tikillugu ukiut 3, qaamm. 4 ull. 16
			Sulinermik misiliineq 281004-mi akuerineqarpoq
20	231103	Inaarne-qanngilaq	Manna tikillugu ukioq 1, qaam. 6 ull. 21
21	040303	Inaarne-qanngilaq	Manna tikillugu ukiut 2, qaam. 3 ull. 9
22	241103	170504	Aalajangiiffigsassanngortitaq, katillugit qaammatit 5 ullullu 23
23	260899	Inaarne-qanngilaq	Suliaq 181200-imit 301101-imut Naammagittaalliuteqartarfimmiissimavoq. Naammagitaalliuteqartarfip kingorna K Kommunimi suliarineqarnera: Ukiut 3, qaamm. 6 ull. 14
24	010702	100604	Ukioq 1, qaammatit 11 ullullu 9
25	151102	Inaarne-qanngilaq	Manna tikillugu ukiut 2, qaamm. 6 ull. 28
26	190104	Inaarne-qanngilaq	Manna tikillugu ukioq 1, qaamm. 4 ull. 24
27	020503	Inaarne-qanngilaq	Manna tikillugu ukiut 2, qaamm. 1 ull. 11
28	010503	Inaarne-qanngilaq	Manna tikillugu ukiut 2, qaamm. 1 ull. 12

29	011000		100604-mi aalajangiiffisassanngortitaq. Katillugit ukiut 3, qaammatit 6 ullullu 9
30	311003	071004	Ukioq 1 qaammatit 8 ullullu 6
31	230903	Inaarne- qanngilaq	Manna tikillugu ukioq 1, qaamm. 8 ull. 20
32	201202	071004	Ukioq 1, qaammatit 9 ullullu 17
33	010302		Qinnuteqartoq nov. 03-mi nunaqarfimmit B-mit K Kommunimut nuuttuuvoq, isuma- ginninnermi inissiamik tunineqarsimalluni. 010604-mi aalajangiiffisassanngortitaq, su- liaq nalinginnaanngitsoq, ilaatinneqanngilaq
34	061003		TFU-revami 091204-mi suliarineqarnissaa naatsorsuutigineqarpoq. Sivikinnerpaamik ukioq 1, qaammatit 2 ullullu 3
35	181103	280205	Uninngatinneqarallarpoq, suli inaarneqarani. Unitsitsigallarnerup tungaanut: Ukioq 1, qaammatit 3 ullullu 10
36	031103	200904	Qaammatit 10 ullullu 17
37	020603	200105	Ukioq 1, qaammatit 7 ullullu 18
38	270503	170205	Ukioq 1, qaammatit 8 ullullu 20
39	130502	200105	Ukiut 2, qaammatit 8 ullullu 7
40	260903	201204	Ukioq 1, qaammatit 2 ullullu 24
41	050303	Inaarne- qanngilaq	Manna tikillugu ukiut 2, qaamm. 3 ull. 8
42	191102		Sulinermik misiliineq 011104-mi akuerine- poq. Manna tikillugu ukiut 2, qaamm. 6 ul- lullu 24
43	020103		Sulinermik misiliineq 130105-imi akuerine- qarpoq. Manna tikillugu ukiut 2, qaamm. 5 ullullu 24
44	011001		Sulinermik misiliineq 161203-mi akuerine- qarpoq. Manna tikillugu ukiut 3, qaamm. 8 ullullu 12
45	260802	Inaarne- qanngilaq	Manna tikillugu ukiut 2, qaamm. 9 ull. 17
46	211103	Inaarne- qanngilaq	Manna tikillugu ukioq 1, qaamm. 6 ull. 22
47	140103	Inaarne- qanngilaq	Manna tikillugu ukiut 2, qaamm. 4 ull. 29
48	251102	Inaarne- qanngilaq	Manna tikillugu ukiut 2, qaamm. 6 ull. 18
49	220403	200904	Ukioq 1, qaammatit 4 ullullu 28
50	260603	130504	Qaammatit 10 ullullu 17
51	060704	200904	Qaammatit 2 ullullu 14
52	250899	Inaarne- qanngilaq	Manna tikillugu ukiut 6, qaamm. 9 ull. 18
53	261102		Qinnuteqartoq 090704-mi toqusimavoq. Suliarineqarpoq aalajangiivigineqarani: Ukiut 2, qaammatit 6 ullullu 17
54	081002	151204	Ukiut 2, qaammatit 2 ullullu 25
55	180203	Inaarne- qanngilaq	Manna tikillugu ukiut 2, qaamm. 3 ull. 25

56	110700	Oqaatigine-qanngilaq	
57	180504	200904	Qaammatit 4 ullu 2
58	131201	Inaarne-qanngilaq	Suliaq 1. marts 04-mi "tamarsimavoq", massakkut aallartinneqarsimavoq
59	250504	200105	Qaammatit 7 ullullu 25
60	080798	161204	Ukiut 6, qaammatit 5 ullullu 8
61	121102	071004	Ukioq 1, qaammatit 10 ullullu 25
62	100703	260405	Tunuartinneqarpoq, TFU-reva 10. marts 05-imi aalajangermat sulinermik misiliissasoq
63	280700	271200	Tunuartinneqarpoq, qaammatit 4 ullullu 29
64	200404	26. maj 2004-mi	inaarneqanng.
65	110203	26. maj 2004-mi	inaarneqanng.
66	260603	26. maj 2004-mi	inaarneqanng.
67	170103	26. maj 2004-mi	inaarneqanng.
68	220304	26. maj 2004-mi	inaarneqanng.
69	271003	26. maj 2004-mi	inaarneqanng.
70	271003	26. maj 2004-mi	inaarneqanng. Allanngorart. suliffik akuerineqarpoq
71	050304	26. maj 2004-mi	inaarneqanng.
72	100303	26. maj 2004-mi	inaarneqanng.
73	170504	26. maj 2004-mi	inaarneqanng.
74	290801	26. maj 2004-mi	inaarneqanng. Sulinermik misiliineq 9. maj 02-mi akuerineqarpoq
75	150404	26. maj 2004-mi	inaarneqanng.
76	090204	26. maj 2004-mi	inaarneqanng.
77	300104	26. maj 2004-mi	inaarneqanng.
78	200803	26. maj 2004-mi	inaarneqanng.
79	280601	26. maj 2004-mi	inaarneqanng. Sulinermik misiliineq 20. februar 03-mi akuerineqarpoq
80	130204	26. maj 2004-mi	inaarneqanng.
81	110703	26. maj 2004-mi	inaarneqanng.
82	241103	26. maj 2004-mi	inaarneqanng.
83	080104	26. maj 2004-mi	inaarneqanng.
84	040304	26. maj 2004-mi	inaarneqanng.
85	260304	26. maj 2004-mi	inaarneqanng.
86	250202	26. maj 2004-mi	inaarneqanng.
87	290903	26. maj 2004-mi	inaarneqanng. Sulinermik misiliineq akuerineqarpoq
88	Oqaatigineqanng.	Oqaatigineqanng.	Qinnuteqaat akuerisassanngorlugu illoqarfimmut B-mut nassiunneqarpoq